

Muselu Wapama wa Yesu Kirixtu woolebiwa ni Zhuwawu

Madhu oovolowana

Niivuru ndda nilebiwe ni murumiwi Zhuwawu. Eewoga oliyeneene ni madhu “namasuuzwa ole Yesu amudhiveliye vajinji”. Zhuwawu aali ddibila a Tiyago amwaana Zebedeyo. Aliba ononelamo Madhu a Mulugu amohi enoobuwelela wi Zhuwawu alebile niivuru ndda muwari mwa yaaka ya 70 ofiyedha 100 Kirixtu agabaliwe.

Zhuwawu ohuwoga mwahaya olebeliye niivuru ndda, wiire: “Dhego nda dhi-lebeliwe wi muroromele wi Yesu di Kirixtu aroromelihiwe, Mwaana a Mulugu, vano mwaroromela mwa Kirixtu mukalena egumi yoohumala odheela mwa ndina naaye” (Zhuwawu. 20.31).

Muniivuru ndda Zhuwawu onawoga vajinji dha egumi yoohumala. Oliye wiire Yesu di egumi (14.6), vano ahiwoga wi Yesu onovaha egumi ya okala ni okala (10.28). Teto Zhuwawu onowoga vajinji dhowaara. Oliye wiire Yesu dili waara onamoneya elabo (8.12).

Ogawanyeya wa niivuru

Mulugu ohusadduwa okala muthu *1.1-18*.

Zhuwawu Namabathiza, anamasuuzwa a Yesu *1.19-51*.

Matikiniho ni olaleya wa Yesu *2.1 ofiyedha 11.57*.

Sumaana yoomariha ya Yesu *12.1 ofiyedha 19.42*.

Ovenyihwa wa Yesu *20.1-29*.

Mwaha wa niivuru *20.30-31*.

Yesu onawoga ni anamasuuzwa aaye amohi *21.1-25*.

Madhu ehisadduwa okala muthu, muthu oyo di Kirixtu

1 ¹Vowambeela wa dhaatedhene yaali Madhu, Madhu yaali vamohi ni Mulugu, vano Madhu yaali Mulugu. ²Okuma omambeelelo Madhu

ala yaali ni Mulugu.

³Mulugu ahipaddusa dhaatedhene mwa Madhu ala teto kavili yego eyene yapaddusiwe Madhu ala ehilivo. ⁴Mwa oliye mwaali egumi, egumiya yaali waara waamoneyela athu. ⁵Waara woomoneya muyiihini teto yiihi kayaandile ogonjiha waara.

⁶Ahikumelela muthu mmohi arumiwe ni Mulugu, ndina naaye eeriwa Zhuwawu. ⁷Oliye ahidha wi akale namoona, ahiirela onamoona waarawo wi athu aatene eroromele waarawo. ⁸Kahuwo wi oliye daali waarawo, mbwenye adheele wiirela onamoona waarawo. ⁹Waara wa ebaribari, waamoneyela athu aatene, wahidha elabo ya vati.

¹⁰Ole oli Madhu aali mwiilaboni ya vati teto Mulugu ahipaddusa elabo ya vati mwa oliye, mbwenye athu a elabo ya vati kayamudidele. ¹¹Oliye ahidha elabo yaaye ya vati, vano athuya kayamwaakele. ¹²Mbwenye aatene yamwaakele, eroromelaga ndina naaye, oliye ahaavaha oneeti wi yiiriwege ahima a Mulugu. ¹³Okala ahima a Mulugu weewa kudheele mwa awale-wale eewa, naari moobaliwa mwa mwiili, naari mwa ofuna wa muthu, mbwenye ebaliwe mwa Mulugu.

¹⁴Madhu yahisadduwa okalana mwiili wa emuthu, odha okalaga vaari va athu.^a Madhu ayo yahidhaaliwa mahala ni ebaribari,^b vano nihoona nthithimiho naaye wona nthithimiho na Mwaana mmohive a Babe.

¹⁵Zhuwawu oomwiirela Yesu onamoona. Awaaddelaga athu, eeraga: “Ola di olene gamuwogiimi wi: Ole onadha mundduli mwaaga, onogikwaranya miyo; vowi gihinabaliwe, oliye ahikalawo”.

¹⁶Hiyo aatene nihaakela mareliho mookwaranya moohuhiedhedha odheela mwa mahala aaye. ¹⁷Malamulo yavahiwe odheela mwa Mozezi, mbwenye mahala ni ebaribari dhidheele mwa Yesu Kirixtu ole aroromelihiwe. ¹⁸Kalivo muthu onamoonaga Mulugu, ahili mmohi baahi, oliye di Mulugu, oli muumohini ni Ababe, dimunoneyihe Mulugu.

Onamoona wa Zhuwawu Namabathiza (*Matewuzhi 3.1-12; Maruku 1.1-8; Luka 3.15-17*)

¹⁹Mudhidhi mmohi apogo a aZhudewu a oZheruzalemi yahaarumaga anamakutha ni aLeevi amohi omukoha Zhuwawu, wiira: “We oli aani?”
²⁰Oliye ahiirelaga onamoona moohulogoha, wiira: “Miyi kagili Kirixtu ole aroromelihiwe, eehi”.

²¹Yahimukohaga teto, wiira: “Ki oli aani? Oli Eliyazi?” Oliye ahiiraga: “Eehi, kagili Eliyazi”. Aliwa yahiiiraga: “Ki oli Namavuhulela onamujejihiihi?”^c Vevale Zhuwawu ahaakulaga, wiira: “Eehi”. ²²Vano

^a 1.14 Moone Okuma 25.8 ^b 1.14 Moone Okuma 34.6 ^c 1.21 *Namavuhulela* Mulugu amuroromelihiye wi oneere omurumiha namavuhulela mmohi wona Mozezi (Deteronomiyo 18.18) teto aZhudewu yoojejiha ofiya waaye. Moone Zhuwawu 6.14; 7.40.

yahimwaaddelaga, wiira: “We oli aani? Owoge ebaribari wi nawaaddele pama ayene enirumile wuno. Onawoga ddi dha we?”

²³ Zhuwawu ahawaakulaga, wiira: Wona mwawogele namavuhulela Ezaya, eera:

“*Miyo gili ndhu na muthu onakuwa mwiiddeddereni onawoga wi: ‘Mmogooolele rampa wi Nabwiya aviremo’*”.^d

²⁴ Athu ale yarumiwege yaaligi a nikuru na aFarizi. ²⁵ Vano yahimukohaga Zhuwawu, wiira: “Akala we kuli Kirixtu aroromelihiwe, naari Eliyazi, naari Namavuhulela ole, ki onabathizela ddi?”

²⁶ Zhuwawu ahawaakulaga, wiira: “Miyo ginabathiza ni mahinje, mbwenye vaari veenyu ohukalavo mmohi nyo muhumunoniliinyu. ²⁷ Muthu oyo onadha mundduli mwaaga, kagifwaneelele otapula mingoyi dha sapho dhaaye”.

²⁸ Dhi dheereyilege oBetaniya, kobela ya mwihinje Zhordawu, wewo Zhuwawu wabathizigiye.

Yesu thili Nibila na Mulugu

²⁹ Omenseloni wiwa Zhuwawu ahimoonaga Yesu adhaaga wa oliye, vevale ahiiraga: “Mmoone, ndde thi Nibila na Mulugu,^e nnavenyihavo dhoothega dha athu a mwiilaboni ya vati. ³⁰ Ola di olene gamuwogiimi wi: ‘Muthu onadha mundduli mwaaga onogikwaranya miyo, vowi gihinabaliwe oliye ahikalawo’. ³¹ Miyo teto kagamunonile, mbwenye gadhee obathiza ni mahinje wi nlogo na Ezarayeli nimunone”.

³² Zhuwawu ahiirelaga onamoona, wiira: “Gahoono Muneba Woweela ni mooneyelo a kangayiwa okitaga odhulu wahimorelaga okala va oliye. ³³ Miyo kagamunonilege, mbwenye Mulugu ogirumile obathiza ni mahinje, digaaddele, wiira: ‘Oyene onadhiiwe omoone Muneba Woweela okitaga odhulu omorela okala va oliye, di oyene onabathizege ni Muneba Woweela’. ³⁴ Miyo gahoonaga, vano gahiirelaga onamoona wi ebaribareene ola di Mwaana a Mulugu”.

Wiithaniwa wa anamasuuzwa owambeela

(*Matewuzhi 4.18-22; Maruku 1.16-20; Luka 5.1-11*)

³⁵ Omenseloni wiwa Zhuwawu agaweleele wewule vamohi ni mwa anamasuuzwa aaye abiili, ³⁶ Zhuwawu ahimoonaga Yesu aviraga, wiira: “Moone, Nibila na Mulugu!”

³⁷ Anamasuuzwa abiili ale egeewile madhu ale, yahimuharaga Yesu. ³⁸ Yesu ahirugunuwaga wawoona wi enoomuhara, vano ahaakohaga, wiira: “Nyo munafuna ddi?” Aliwa yahiiraga: “Rabi, munakala wuuvi?” (Otapulela wa Rabi sowi Namasuuziha.) ³⁹ Yesu ahiiraga: “Mudhe moonewo

^d 1.23 Ezaya 40.3 ^e 1.29 Moone Okuma 12.4

onakaliimi”. Vano wora egali wona nnayi ya ciguwo, aliwa yahimveleelaga, woonawo wakaliye, vano yahikalaga ni oliye mahiyu alene.

⁴⁰Mmohi mwa abiili ale eewilege madhu a Zhuwawu amuhara Yesu, aaligi Andire. Andire aali ddibila a Simawu Peduru. ⁴¹Vevale vowambee-la amfwanyilege ddibile Simawu, omwaaddela, wiira: “Nihimfwanya Muthikitheliwi”.^f (Enatapulela *Kirixtu ole aroromelihiwe*.) ⁴²Nuwindo, ahimudhowagana wa Yesu. Yesu ahimusugwaga, wiira: “We oli Simawu, mwaana a Zhuwawu. Ndina naawo onakala Sefasi”. (Otapulela wa madhu owi Sefasi mu ewogelo ya eZhudewu, sowi: Peduru.)^g

Yesu onomwiithana Filipi ni Nataniyeli

⁴³Omenseloni wiwa Yesu ahimaruwelaga olenddo woodhowa oGalileya. Ahimfwanyaga Filipi, omwaaddela, wiira: “Ogihare”.

⁴⁴Filipi aali a nluwa na oBetisayida, owaniwa wa Andire ni Peduru. ⁴⁵Filipi ahimfwanyaga Nataniyeli omwaaddela, wiira: “Nihimfwanya muthu ole aroromelihiwe Mozezi amulebiliye mMalamuloni teto ni dhabile anamavuhulela. Oliye di Yesu a oNazarethi, mwaana a Zhuuze”.

⁴⁶Mbwenye Nataniyeli ahiiraga: “ONazarethi! Mburo woonyemuwa kunaakume yego yapama!” Filipi ahiiraga: “Ndowe wi woone”.

⁴⁷Yesu agamoonile Nataniyeli adhaaga wovi hivale ahiiraga: “Mmoone ohufiya muEzarayeli a ebaribari oohukanna yoonyengetha”.

⁴⁸Nataniyeli ahimukohaga, wiira: “Muginonile addi?” Yesu ahiiraga: “Filipi ahinowiithane, miyo guhuwoona ogali musiddo mwa namutaambwi”.^h

⁴⁹Nataniyeli ahiiraga: “Namasuuziha, nyo muli Mwaana a Mulugu, muli Mwene a Ezarayeli”.

⁵⁰Yesu ahimukohaga, wiira: “Orumeedhele mwaha wi guhuwaaddela wi guhuwoona ogali musiddo mwa namutaambwi? Oneere wona dhootikiniha okwaranya dhedhi”. ⁵¹Ahiwelelaga owoga, wiira: “Ebaribareene, ebaribareene ginowuwaaddelani wi munoodha moone odhulu ogathuleye, angero a Mulugu egwelaga, ekitelaga vili Mwaana a Muthu”.ⁱ

Matelo a oKana

2 ¹Vigavirile malabo maraaru, wahikalaga matelo mudhi wa oKana murudda wa oGalileya. Amaaye Yesu yaaligi wewo. ²Yesu vamohi

^f **1.41** *Muthikitheliwi* aali ole Mulugu amusakuliye wi avulumuse mulogo waaye. Mu ewogelo ya eGerego *Kirixtu* yootapulelaya si emohive wi *Muthikitheliwi* mu ewogelo ya eHeberi. Mu elemeelelo ya eTakwani eneera waathikithela mamwene ni saambale, mbwenye aZhudewu yeera waaminelana ni makura anamakutha, mamwene, ni asogoleli a mitugumano. Moone Okuma 28.41; Samuweli a Nabiili 16.1-13; Ezaya 61.1. ^g **1.42** *Peduru* mu ewogelo ya eGerego enatapulela *nibwe*. ^h **1.48** *Namutaambwi* Naari wi: *namutaambu*. ⁱ **1.51** Moone Wambeela 28.12

ni anamasuuz aaye teto yahiithaniwaga omateloni. ³Vinyu agamalile, amaaye Yesu yahimwaaddelaga, wiira: “Vinyu ohaamalela”.

⁴Yesu ahaakulaga, wiira: “Mmani, ki munafuna giire ddi? Mudhidhi waaga kunafiye”.

⁵Vevale amaaye yahawaaddelaga amwiimeleli, wiira: “Dhaatedhene dhinowaaddeligiiyeni, mwiirena”.

⁶Vevale vahikalaga mapiso a mabwe matanu ni nimohi, ayene yaahe-liliisuvo mwaha wa elemelelo yowiyeeliha wa aZhudewu. Mapiso ale yaakwana vakukuuve maniituru makumi matanu ni maraaru (80), mamohi yaakwana vakukuuve maniituru zana ni makumi meenddi (120). ⁷Yesu ahawaaddelaga amwiimeleli ale, wiira: “Dhaalihani mahinje mapiso ala”. Vano yahidhaalihaga ofiya mmilomoni.

⁸Nuwindo, Yesu ahawaaddelaga, wiira: “Dhiinova mwaarugwe, mwaadhowena wa mpogo a mathanga”. Aliwa yahaadhowagana.

⁹Vevale mpogo a mathanga ahaalawihaga mahinje, vano yahisadduliwa okala vinyu. Oliye kaanonilege wadhiilege vinyu ole. (Mbwenye amwiimeleli yaarugwilege mahinje ale, yahinonagawo.) Vano mpogo a mathanga ahimwiithanaga namatelaya, ¹⁰omwaaddela, wiira: “Akwiinyu enamvaha vowambeela vinyu apamaya, athuya yalezela, waavahaga vinyu oodhiva vang’ono. Mbwenye nyo mmulogolele vinyu apama vajinji ofiyedha dhiinova”.

¹¹Yesu ahoonihaga etoonyihedho yaaye yowambeela mudhi wa oKana murudda wa oGalileya. Vevale ahoonihaga nthithimiho naaye teto anamasuuz aaye yahimuroromelaga. ¹²Vooharela Yesu ahidhowaga oKafaranawu, vamohi ni amaaye, addibile ni anamasuuz aaye, yahikala wewo malabo oweelengeya.

Yesu onoweeliha nyuba ya Mulugu

(*Matewuzhi 21.12-13; Maruku 11.15-18; Luka 19.45-46*)

¹³Ogaaddamele mudhidhi wa Paxkwa, othabela wa aZhudewu,^j Yesu ahimaruwaga ogwela oZheruzalemi. ¹⁴Wewo ahivolowaga nyuba ya Mulugu waafwanyamo athu egulihaga ng’ombe, mabila ni kangayiwa. Mwahikalaga teto athu oocanja korowa.^k ¹⁵Vevale Yesu ahisasanyaga muwaxaxu wa mungoyi wambeela waakumihedha aatene ode, vamohi ni mabila ni ng’ombe dhiwa-dhene. Ahibidhulaga meeza oocanja korowa, omwadha korowa dheewa. ¹⁶Teto ahaalumulaga ooguliha kangayiwa

^j 2.13 Paxkwa yaali mathanga oofuneyesesa a aZhudewu. Moone Okuma 12.1-27. Vowi Yesu avenyihiwe nlabo nenddo na Paxkwa, hiyo dhiinova Paxkwa eehu nnathabela ovenyihiwa muukwani wa Yesu. ^k 2.14 Oocanja korowa Vathaddo va Nyuba ya Mulugu yoogulihavo dhoofuwa wi athu evelelelege mikutho. Teto yoocanja korowa dha oRoma ni korowa dha eZhudewu mwaha wi Nyuba ya Mulugu kayarumeedha dhoovelelela dha koro-wa dha oRoma.

ale, wiira: “Ndo kumihamoni. Nyuba ya Ababa kamusaddule okala nyuba yomweeddamo nagooso”.

¹⁷Anamasuuzi aaye yahuubuwelelaga Maleba Ootaleleya ale yiire: “*Nthakwithakwi ninniimina wa nyuba yaawo nnogizhiha murima*”.¹

¹⁸Vevo apogo a aZhudewu yahimukohaga, wiira: “Onaanoonihe etoonyihedho baani, enooniha wi ohukanna owodha wowiirana dhedhi?”

¹⁹Yesu ahawaakulaga, wiira: “Bwanyulani nyuba ya Mulugu ela, miyo ginoodha gimage va malabo maraaru”.

²⁰Vevo aliwa yahiiraga: “Nyuba ya Mulugu ela ehilogela yaaka makumi mannayi ni yaaka tanu ni emohi emagiwaga, vano nyo munamage malabo maraaru baahi?” ²¹Mbwenye nyuba ele Yesu yawogigiye, awogaga dha mwiili waaye. ²²Oliye agavenyihwe muukwani, anamasuuzi aaye yahuubuwelelaga wi ahiwoga dhedhi, vano yahiroromela Maleba Ootaleleya ni madhu yaawogila Yesu.

Yesu ohunona dhowuubuwelela dha athu aatene

²³Yesu agali muZheruzalemi vamathangani a Paxkwa, athu ajinji yahiroromelaga wa oliye vowoona dhitoonyihedho dheeriyena. ²⁴Mbwenye Yesu kaaroromela aliwa mwaha wi oliye ahinona moobuwelelo a athu aatene. ²⁵Kayafuneya wi muthu mmohi amwaaddele dha athu aatene, vovi mwiinyeene oonona moobuwelelo a mmirimani mwa athuya.

Yesu onothapanya ni Nikodemu

3 ¹Ahikalawo muthu mmohi a nikuru nuulubale na aFarizi, ndina naaye eeriwa Nikodemu, musogoleli a aZhudewu. ²Oliye ahidhaaga mahiyu wa Yesu, wiira: “Namasuuzi, nihinona wi muli namasuuziha ookumela wa Mulugu, vovi kavili muthu onaanda wiirana dhitoonyihedho dhedho nyo muneeriinyuna, Mulugu aahikala ni oliye”.

³Yesu ahiiraga: “Ebaribareene, ebaribareene ginowuwaaddela wi muthu aahibaliwa dila biili, kanoone Omwene” wa Mulugu”.

⁴Nikodemu ahimukohaga, wiira: “Ki muthu onaande addi obaliwa dila biili agooluvale? Oneere ovolowa mbaani mwa amaaye wi abaliwe dila biili?”

⁵Yesu ahiiraga: “Ebaribareene, ebaribareene ginowuwaaddela wi muthu aahibaliwa mmahinjeni ni mwa Muneba Woweela, kanaakwanaha ovolowa mu omwene wa Mulugu. ⁶Enabaliwa mwa omuthu ba omuthu baahi, mbwenye enabaliwa mwa Muneba ba muneba. ⁷Kutikine vuwaaddeliimi giira soofuneya wi obaliwe dila biili. ⁸Pevo enowoobela wewo onafuniwa teto onowiiwa wooba wiwa, mbwenye kunanona

¹ 2.17 Masaalimu 69.9 ^m 3.3 Madhu owi dila biili enatapulela teto obaliwa wookuma odhulu.

onakumiiwa naari onadhowiwa. Dhinoologana ni athu aatene ayene enabaliwa mwa Muneba Woweela”.

⁹Nikodemu ahimukohaga, wiira: “Dhedhi dhinaandeye addi?”

¹⁰Yesu ahiiraga: “We kuli namasuuziha oononeya vaari va aEzara-yeli, ki vano kuneeweelamo dhego nda? ¹¹Ebaribareene, ebaribareene ginowuwaaddela wi nnawoga dhinoniliihu teto nneerela onamoona dhooniliihu, mbwenye nyo kamunaroromela onamoona weehu ola.

¹²Akala kamunaroromela dhinowaaddeliimini dha elabo ela ya vati, ki munadha muroromele addi gowaaddelani dha odhulu? ¹³Kaavo agwelile adhowa odhulu, ahili ole okitile odhulu, Mwaana a Muthu.

¹⁴“Wona mwemo Mozezi mwatomeyeliye nyowa vamuthankoni mwiiddeddereni,” mwa mukalelo mmohive Mwaana a Muthu soofuneya wi atomeyiwe, ¹⁵wi aatene enamuroromela oliye ekalena egumi yoohumala.

¹⁶“Mulugu ahidhivela vajinji elabo ela ya vati, ofiyedha ompeleka Mwaanaye mmohive wi aatene enaamuroromele ehirimeele, mbwenye ekalena egumi yoohumala. ¹⁷Mulugu ahimuruma Mwaanaye elabo ya vati ehili wi athonge elaboya, mbwenye wi mwa oliye evulumusiwe.

¹⁸“Ole onamuroromela kanathongiwa, mbwenye ohunamuroromela ohuthongiwa mwaha wi karoromele ndina na Mwaana mmohive a Mulugu. ¹⁹Muladduya buula: Waara ogadhiile elabo ya vati, athuya yadhiveliwe yihi, ohiya odhiveliwa waara mwaha wi dhowiira dheewa dhaali dhootakala. ²⁰Aatene eneerana dhootakala, enowiiddana ni waara. Kinaaddamela vowaara enoova wi dhowiira dheewa dhinooneyege. ²¹Mbwenye oneerana dhoororomeleya onowooneyela vowaara teto dhowiira dhaaye dhinononeya wi ohiirana momwiiwelela Mulugu”.

Zhuwawu Namabathiza onomwiirela Yesu onamoona dila ya nabiili

²²Vevale Yesu ni anamasuuzi aaye yahidhowaga okala murudda wa oZhudeya. Ahikala wewule ni aliwa mudhidhi mujinji, aabathizaga athu.

²³Teto Zhuwawu oobathiza oEnoni vakukuuve ni Salimi mwaha wi wewo wahikala mahinje majinji. Athu yoofiyawo, oliye waabathizaga.

²⁴(Mudhidhi oyene Zhuwawu aali ahinafugeliwe mukaambura.)

²⁵Anamasuuzi amohi a Zhuwawu yahambeelaga okangana ni muZhudewu mmohi mwaha wa elemeelelo yowiyeeliha. ²⁶Mowindo anamasuuzi yahidhaaga wa Zhuwawu omwaaddela, wiira: “Namasuuziha keeng'anani, muthu ole aali ni nyo kobela ya Zhordawu, olene mwamwiireliinyu onamoona ni oliyeene onobathiza, athu aatene enamuthamagela oliye”.

²⁷Zhuwawu ahaakulaga, wiira: “Muthu kanaakele yego eli yaatene Mulugu ahimvahile. ²⁸Nyo muli anamoona aaga dhowi gahiira: ‘Kagili

ⁿ 3.14 Numero 21.8-9

Kirixtu^o ole aroromelihiwe, mbwenye gili oorumiwa osogolo waaye'.
²⁹Muliba oteliwa mwiinya di ole omutelile. Mukwaaye a namatela onomveleela baahi, onohagalala eewaga madhu a namatelaya. Teto mwa mukalelo mmohive peeno ohagalala waaga ohaakwanela. ³⁰Soofuneya oliye oonuwege, miyo giyevege".

³¹"Ookumela odhulu oli vadhulu va aatene. Ookumela vati vano da vati veva teto onowoga dha vati vano. Ookumela odhulu oli vadhulu va aatene. ³²Oliye onowiirela onamoono dhedho dhooniliye ni onona naari ndo kalivo onaarumeedha madhu aaye. ³³Mbwenye muthu onarumeedha madhu aaye, onodidela wi Mulugu da ebaribari. ³⁴Oyene Mulugu omurumiliye, onowoga madhu a Mulugu, vowi Mulugu onoveleela Muneba Woweela moohuyedhedha. ³⁵Baabi onomudhivela Mwaanaye teto ahihela dhaatedhene mmadani mwaaye. ³⁶Muthu onamuroromela Mwaana oyo, ohukanna egumi yoohumala. Mbwenye onakoodda omuroromela Mwaana oyo, kadha oona egumi, mwaha wi owali wa Mulugu oli va oliye".

Yesu ni mwihiyana a murudda wa oSamariya

4 ¹AFarizi yahiiwa wi Yesu onowaakwekwetha anamasuuzi aji-nji aabathizaga omukwaranya Zhuwawu. ²(Mbwenye ebaribari, abathiza kaali Yesu oyo, yaali anamasuuzi aaye). ³Yesu aganonile wi aFarizi ehiiwa dhedho, ahivenyagawo oZhudeya odhowaga oGalileya. ⁴Yaali yoofuneya wi Yesu avire murudda wa oSamariya wi afiye oGalileya. ⁵Vano ahifiyaga nluwa nimohi na oSamariya, ndina niwa Sikari, vakukuuve ni mudda oyene Yakobo wamvahiliye mwaanaye, Zhuuze.^p ⁶Wewo wahikala ceela ya Yakobo. Yesu ahikaraatigi seresere ya ceela ele mwaha wi ahigomaga ni weedda. Yaaligi wora ya neekumi nabiili ya mutana, ⁷⁻⁸vano anamasuuzi aaye yadhowilege oluwani ogula dhooja. Egadhowile vahifiyaga mwihiyana mmohi a oSamariya adheelaga orugwa mahinje. Yesu ahimulobaga, wiira: "Mugivahe mahinje oong'wa". ⁹Mwihiyana a oSamariya ole ahaakulaga, wiira: "Nyo muli muZhudewu, mwaha wa ddi munagilobeliinyu mahinje, miyo ngali muSamariya teto gili mwihiyana?" (Vowi aZhudewu kineeddelana ni aSamariya.) ¹⁰Yesu ahiiraga: "Wahaanonege Mulugu enandiiye ovaha teto wahaamunone oyene onaloba mahinje oong'wa, we weere omuloba, oliye eere wuvaha mahinje enavaha egumi".^q ¹¹Mwihiyana ole ahiiraga: "Babani, kamwinna yoorugwana teto ceela ela sooddiha. Ki mahinje oovaha egumi ayo

^o 3.28 Kirixtu mu ewogelo ya eGerego enatapulela *Muthikitheliwi, Misiya*, naari wi: *oosakuliwa a Mulugu*, oyene onaavulumuse athu. ^p 4.5 Wambeela 33.19; 48.22; Zhozuwe 24.32 ^q 4.10 Madhu a eGerego eneera *egumi* notapulela teto *othamaga wa mahinje*. Bu mwahaya mwihiyana ola oobuwelaga wi Yesu aagana needduuddu a mahinje enathamaga.

munaadhana wuuvi? ¹² Yakobo, nikolo neehu danivahile ceela ela, mwii-nyeene vang'wiye vamohi ni anaaye teto ni dhoofuwa dhaaye. Ki nyo muhumukwaranya oliye?" ¹³ Yesu ahiiraga: "Aatene enang'wa mahinje ala enowelega okulana nthona. ¹⁴ Mbwenye ole onaadhe ang'we mahinje ayene miyo ginamvahiimi, kadha awelela okulana nthona. Vowi mahinje ayene ginamvahiimi enomusaddula okala aneedduuddu enaakumege mahinje oovaha egumi yoohumala". ¹⁵ Mwihiyana ole ahiiraga: "Babani, givahewoni mahinje ayene wi gihiwelele okulana nthona naari odhaaga orugwaga mahinje wuno".

¹⁶ Yesu ahiiraga: "Dhowa wamwiithane mamuno, adhe wuno". ¹⁷ Mwihiyana ole ahiiraga: "Kaginna mamunaga". Yesu ahaakulaga, wiira: "Ohuwoga pama wi kawinna mamuno. ¹⁸ Vowi wahiteliwa wale ni alobwana atanu, vano mulobwana onakaliwena dhiinova kahuwo aawo. Dhiwogiliwe seebaribari". ¹⁹ Mwihiyana ole ahaakulaga, wiira: "Babani, dhiinova gihinona wi muli namavuhulela. ²⁰ Makolo eehu yamweebdhesa Mulugu mwaango olena,^r mbwenye nyo aZhudewu muneera wi ofwanelele athu weebedha fu oZheruzalemi". ²¹ Yesu ahimwaaddelaga, wiira: "Mmani, girumeedheni wi onoodha mudhidhi vevo munamweebedhigiinyu Baabi, ohukala vamwaangoni ola naari oZheruzalemi. ²² Nyo aSamariya muneebedha eyene ehinoniliinyu. Hiyo aZhudewu nneebedha eyene enoniliihu, vovi ovulumusa onakumela mwa aZhudewu. ²³ Onoodha mudhidhi teto ohufiya mudhidhiya, vevo athu oweebedha mwa ebaribari enoodha emweebedhege Baabi mwa muneba ni mwa ebaribari. Baabi onaafuna athu owindo wi bineere emweebedhege. ²⁴ Mulugu di muneba, vano oomweebedha emweebedhege mwa muneba ni mwa ebaribari". ²⁵ Mwihiyana ole ahiiraga: "Gihinona wi onoodha Muthikitheliwi^s ole aromelihiwe teto ononiwe ni ndina na 'Kirixtu'. Oliye afiya onoodha anaaddele dhaatedhene". ²⁶ Yesu ahimwaaddelaga, wiira: "Dimiyeene ginawoga ni we".

²⁷ Mudhidhi oyene anamasuuzwa a Yesu yahifiyaga, yahitikinga voomona athapanyaga ni mwihiyana. Naari ndo kaalivo amukohilege, eera: "Onafuna ddi?" naari: "Munathapanyedha ddi ni mwihiyana ola?" ²⁸ Mwihiyana ole ahihiyaga muno waaye odhowa muluwani wawaaddele athu, wiira: ²⁹ "Ndoweni, mwamoone muthu ogaaddele dhaatedhene

^r 4.20 *Mwaango olena* Olena bu mwaango wa Zherizimu vakukuwe ni Samariya. Wale aSamariya yahimagavo nyuba yomweebedhamo Mulugu. Nyuba eyo egabwanyuliwe, aSamariya yeebedha vamwaangoni olene. ^s 4.25 *Muthikitheliwi* aali ole Mulugu amusakuliye wi avulumuse mulogo waaye. Mu ewogelo ya eGerego *Kirixtu* yootapulelaya si emohive wi *Muthikitheliwi* mu ewogelo ya eHeberi. Mu elemeelelo ya eTakwani eneera waathikithela mamwene ni saambale, mbwenye aZhudewu yeera waamiminela makura anamakutha, mamwene, ni asogoleli a mitugumano. Moone Okuma 28.41; Samuweli a Nabiili 16.1-13; Ezaya 61.1.

dhedho dheerimina. Kadha akala Kirixtu ole aroromelihiwe?”³⁰ Vevale athu ale yahikumaga muluwani mule odhowa wa Yesu.

³¹Mudhidhi oyene anamasuuz a Yesu yahimulobaga ni ntidi, wiira: “Namasuuziha, jani”.³² Oliye ahiiraga: “Miyo gihikanna yooja emohi nyo muhunonilinyu”.³³ Vevale anamasuuz a ale yookohanaga mmohi ni mukwaaye, wiira: “Sowi ohukalavo omudheelena yooja?”³⁴ Mbwenye Yesu ahaakulaga, wiira: “Yooja yaaga fuwirana efunelo ya ole ogirumile wi gimarihe mabasa egivahiliye.”³⁵ Nyo kamuneera: ‘Dhavira mweeri minnaye, onofiya mudhidhi woohadda?’ Mbwenye miyo gineera: Mfugule meento, musugwe mmiddani. Musugwe wi dhilo dhiihithwa ohufiya mudhidhi woohadda.³⁶ Dhiinova, namahadda onalaba, onowaakelave yooliveliwa yaaye. Dhilo dhinahaddiye si egumi yoohumala wa athu. Mowindo namadhala ni namahadda enahagalala vamohive.³⁷ Ebaribari dhinowogiwa wi: ‘Onadhala di mmohi, onahadda di mmohiwa’.³⁸ Miyo guhurumani wi muhadde dhedho dhikumiheliinyu nikurumela. Amohi bikumihile nikurumela, nyo daakelile opura wa nikurumela neewa”.

³⁹ASamariya ajinji a mmuruddani mule yahimuroromelaga Yesu mwaha wa onamoona wa mwihiyana ole, wowi: “Oliye ohugaadde-la dhaatedhene dheerimina”.⁴⁰ Vevale aSamariya yahifiyaga wa Yesu, omuloba wi akale ni aliwa wewule. Vano ahikala wewule malabo meenddi.⁴¹ Vevale athu amohi ajinji yahimuroromela Yesu mwaha wa madhu aaye.⁴² Vowi yahimwaaddelaga mwihiyana ole, wiira: “Dhiinova nihiroromela, ehili mwaha wa madhu aawo, mbwenye mwaha wi nihiiwa weekiihu. Nihinona wi ola di Mvulumusi a athu a elabo yaatene ya vati”.

Yesu onomuyiliha mwaana a nameeddiha dha mwene
(*Matewuzhi 8.5-13; Luka 7.1-10*)

⁴³Vigavirile malabo meenddi, Yesu ahivenyaga wewule odhowaga oGalileya.⁴⁴ Yesu mwiinyeene ahiiraga: “Kawuli namavuhulela onarihiwa veelaboni vaaye”.⁴⁵ Naari ndo vafiyiligiye oGalileya, aGalileya yahimwaakelaga mwaha wi aliwa teto yahidhowagawo omamuthabelelo Paxkwa^t oZheruzalemi, yagoonaga dhaatedhene Yesu dheeriligiye wewo.

⁴⁶Yesu ahidhowaga dila ya nabiili nluwa na oKana murudda wa oGalileya, wewo oliye waasadduligiye mahinje ekala vinyu. Wahikala wewule nameeddiha dha mwene^u mwaanaye abulela oKafaranawu.⁴⁷ Veewiligiye wi Yesu ahiwelawo oZhudeya ohufiya oGalileya, ahidhowaga wa

^t 4.45 Mathanga a Paxkwa yaali mathanga oofuneyesesa a aZhudewu. Moone Okuma 12.1-27. Vowi Yesu avenyihiwe nlabo nenddo na Paxkwa, hiyo dhiinova Paxkwa eehu nathabela ovenyihiwa muukwani wa Yesu. ^u 4.46 Nameeddiha dha mwene Naari wi: *zharenti*. Muthu ola mabasa aaye bookameela mabasa maatene a mwene.

oliye omuloba wi adhowe oKafaranawu, amuyilihe mwaanaye aaligi vakukuuve ni okwa. ⁴⁸Yesu ahimwaaddelaga, wiira: “Mwaahoono dhitoonyihedho ni dhootikiniha, kamunaroromela”. ⁴⁹Nameeddiha ole ahiiraga: “Nabwiyani, ndoweni mowaaguva, mwaanaga ahinakwe”. ⁵⁰Yesu ahimwaaddelaga, wiira: “Dhowa! Mwaanawo onokalawo”. Muthu ole ahiroromelaga madhu a Yesu, odhowa owaniwa. ⁵¹Mundila ahigumanaga ni amwiimeleli aaye, aliwa yahimwaaddelaga, wiira: “Mwaaninyu oneere okalawo”. ⁵²Ahaakohaga dha mudhidhi wambeeliye oyila mwaana ole, aliwa yahiraga: “Nipaddawe naaye nimwihiyile ndilo mudhidhi wa wora emohi ya mutana”. ⁵³Baabi ole ahinonelagamo wi waali mudhidhi olene Yesu wamwaaddeligiye, eera: “Mwaanawo onokalawo”. Oliye vamohi ni aatene a vaade vaaye yahimuroromelaga Yesu.

⁵⁴Ela yaali etoonyihedho yaaye ya nabiiili Yesu yoonihiligiye vaweliligiye oZhudeya afiyaga oGalileya.

Yesu onomuyiliha muthu a oBetzata

5 ¹Dhigeereye ndo, wahikalaga othabela wa aZhudewu, Yesu ahidhowaga oZheruzalemi. ²Wewo oli nthiya, ndina niwa mu ewogelo ya eZhudewu nneeriwa Betzata. Nthiya nddi nili vakukuuve ni Vamavolowelo va Mabila, nowaapeleliwa ni makodde matanu. ³Mmakoddeni mwiwa mookonaantesa athu ajinji oobulela: oohoono, ooragala meddo ni oopondeya yaano. [Aliwa yajejiha wi mahinje ekahinyeye. ⁴Vowi mudhidhi mmohi mungero a Nabwiya ookitela vanthiyani vale okahinya mahinje ale. Owambeela obwinavo mahinje yakahinyiwa, naari akalena oreda buuredda ooyila.] ⁵Vaari va athu ale ahikalagavo ookwa-yaano mmohi abulele yaaka makumi maraaru ni yaaka tanu ni tharu. ⁶Yesu ahimoonaga agali ookonaanteene, onona wi ahibulela mudhidhi mujinjeene. Ahimukohaga, wiira: “We onofuna oyila?” ⁷Ookwa-yaano ole ahimwaakulaga, wiira: “Nabwiyani, kaginna muthu oogikamihedha obwina vanthiyani va, mahinje yakahinyiwa. Miyo gafunaga obwinavo, mmohi dinaaguvula obwinavo gihinafiyevo”. ⁸Yesu ahimulamulaga, wiira: “Venya, othukule olili waawo, weeddege”. ⁹Vevale muthu ole ahilyilaga, othukula olili waaye, wambeela weedda.

Nlabo nddo naaligi sabuddu. ¹⁰Mowindo aZhudewu yahimwaaddelaga muthu ayilihewege ole, wiira: “Peeno sabuddu. Malamulo eehu kinaru-meedhiha othukula olili waawo nlabo na sabuddu.” ¹¹Oliye ahiiraga: “Ole ogiyilihile digaadde, wiira: ‘Thukula olili waawo, weeddege’ ”.

^v 5.2 *Vamavolowelo va Mabila* naali ndina na vamavolowelo va cinga naapeelele nluwa na oZheruzalemi. Vavoloweliwa yaadhaagana mabila ni mbuzi dha mikutho muwari mwa Zheruzalemi. Moone Neemiya 3.1; 12.39. ^w 5.10 Malamulo a Mozezi enokoooddiha olaba nlabo na sabuddu. Moone Okuma 20.8-11; Deteronomiyo 5.12-14.

¹²Aliwa yahimukohaga, wiira: “Muthu baani wuwaaddele wi othukule olili waawo, weeddege?” ¹³Mbwenye ooyilihiwa ole kaamunonilege amuyilihilege, vowi Yesu ahirimeelaga vaari va anamwinji yaaligi vevale.

¹⁴Vooharela Yesu ahimfwanyaga ooyilihiwa ole mu nyuba ya Mulugu, omwaaddela, wiira: “Keeng’ana, vano ohuyila. Kuwelele othega wi enaadhe yuunorele yowoopiha emohi yookwaranya elene”. ¹⁵Muthu ole ahidhowaga waaddela asogoleli a aZhudewu, wiira: “Ogiyilihile di Yesu”.

¹⁶Mwaha wi naali nlabo na sabuddu Yesu veeriligiiyena dhedhi, asogoleli a aZhudewu yahambeelaga omuharahara. ¹⁷Yesu ahawaaddelaga, wiira: “Ababa enoolabave ofiyedha dhiinova, mowindo miyo teto ginoolabave”. ¹⁸Mwahaya buuyene asogoleli a aZhudewu wathabweliwa omusayela efunaga ompa. Yeeraga wi kanahariha nlamulo nnawoga dha sabuddu teto onowoga wi Mulugu di Babe, eeliganihaga ni Mulugu.

Owodha wa othongi wa Mwaana

¹⁹Vano Yesu ahiiraga: “Ebaribareene, ebaribareene ginowuwaaddelani wi miyo kaginaanda wiirana yego menkaaga. Gineerana dhinooniimi Baabi eeragana. Dhaatedhene Baabi dhineeriyena, Mwaana teto oneerana dhimohive.

²⁰Vowi Baabi onomudhivela Mwaana, omoonihaga dhaatedhene dhedho oliye dhineeriyena. Baabi onoodha amoonihe mabasa ookwaranya alena wi mudhe mutikine. ²¹Wona Baabi onaavenyiha muukwani, aavahaga egumi, mowindo Mwaana onowaavaha egumi ayene oliye enaafuniye waavaha egumi.

²²Baabi kanamuthonga muthu oli aatene, mbwenye omuthomele Mwaanaye wi akale namathonga a dhaatedhene. ²³Baabi onafuna wi athu aatene emuriihege Mwaana wona munamuriiheliwa Baabi. Muthu ohunamuriiha Mwaana, kanamuriiha Baabi omurumile.

²⁴“Ebaribareene, ebaribareene ginowuwaaddelani wi muthu oneewa ndhu naaga, amuroromela ogirumile, ohukanna egumi yoohumala. Oliye kadha athongiwa, mbwenye ohuvira muukwani ohuvolowa mwiigumini. ²⁵Ebaribareene, ebaribareene ginowuwaaddelani wi onoodha mudhidhi teto ohufiya mudhidhiya, athu ekwile vineeriiwa yiiwe ndhu na Mwaana a Mulugu, ayene eneewe eneere okalawoove. ²⁶Wona Baabi oli needduuddu a egumi, mwa mukalelo mmohive ohumuthomela Mwaana wi ni oliyeene akale needduuddu a egumi. ²⁷Ahimvaha Mwaana owodha wa othongi, mwaha wi di Mwaana a Muthu. ²⁸Kamutikine dhedhi, vovi onoodha mudhidhi vevo athu aatene eli mmasiye vineeriiwa yiiwe ndhu naaye, ekumemo. ²⁹Athu ayene yirilena dhapama, evenyihiwe wi ekalena egumi, mbwenye ale yirilena dhootakala, evenyihiwe ethongiwe, ekoniwe”.

Onamoona womwiirela Yesu

³⁰“Miyo kaginaanda wiirana yego menkaaga. Ginathonga mooligana munagaaddelela Ababa. Ginathonga mowogoowa, mwaha wi kaginahara dhinafuniimi, mbwenye dhinafuni oiyene ogirumile.

³¹“Akala gineyiirela onamoona menkaaga, onamoona waaga bohaa-kwanela. ³²Ohukalavo mmohi onagiirela onamoona, gihinona wi onamoona onagiireliye bwa ebaribari. ³³Nyo mwahaaruma aliba mutheenga wa Zhuwawu Namabathiza, oliye ahiirela onamoona wa ebaribari. ³⁴Miyo kaginarabulela onamoona wa muthu, mbwenye ginawogela dhedhi wi mvulumuwe. ³⁵Zhuwawu aali wona panti yoohipda yowaara, vano mwa mudhidhi vang'ono mwahifuna ohagalala ni waara waaye. ³⁶Mbwenye miyo gihikanna onamoona wookwaranya ole wa Zhuwawu. Mabasa enaahiddiimi egivahile Baabi wi gaahiddege enogiirela onamoona. Mabasa ayo enowooniha wi Baabi digirumile. ³⁷Baabi ogirumile, onogiirela onamoona. Vano nyo kamuneewa ndhu neewa, naari kamunoonene mooneyelo eewa. ³⁸Madhu eewa kinakalave mmirimani mweenyu, mwaha wi kamunamurromela oyene Baabi omurumiliye. ³⁹Munosuza Maleba Ootaleleya mowaatiba, mwaha wi munoobuwela ofwanyamo egumi yoohumala. Maleba ayo binagiirela onamoona! ⁴⁰Naari ndo nyo munokooda odha wa miyo wi mukanne egumi.

⁴¹“Miyo kaginapwatha dhedho mwaha wi oriihiwa waaga kunda-dheela wa athu. ⁴²Guhuunonani; nyo kamwinna odhivela wa Mulugu mmirimani mweenyu. ⁴³Miyo gidhiile mu ndina na Baabi kamugaakele. Mbwenye mmohi adha mu ndina na oliye yeeka, munomwaakela. ⁴⁴Ki munaromele addi, mudhiveliwaga oriihana vikaleliinyu, muhsayelaga oriiha onadheela wa Mulugu mmohive? ⁴⁵Muhuubuwele wi ginowuusumelani wa Baabi. Ohukalawo onoosumeleni: Mozezi munamurromeliinyu dinoosumeleni. ⁴⁶Mwahaamurromele Mozezi mwa ebaribari, mweerege ogiroromela, vovi oliye alebile dha miyo.^x ⁴⁷Mbwenye akala kamunaroromela dhalebiliye, ki munaaromele addi madhu aaga?”

Yesu onowiinjiviha mikaathe ni somba

(*Matewuzhi 14.13-21; Maruku 6.30-44; Luka 9.10-17*)

6 ¹Nuwindo, Yesu ahilabuwaga Nyaza ya oGalileya (naari wi Nyaza ya oTiberiyasi). ²Anamwinji yahimuharaga, mwaha wi yahoonaga dhitoonyihedho dheerigiiyena vowaayiliha aredda. ³Yesu ahigwelaga vamwaangoni, okaraati ni anamasuza aaye. ⁴(Mudhidhi wa mathanga oofuneya a aZhudewu, eneeriwa Paxkwa,^y wahaaddamela.) ⁵Vevale Yesu veeng'aniligiye, ahawoonaga anamwinji emudheelaga. Vano ahimukohaga Filipi, wiira: “Ki nnaagule waani dhootakuna wi athu aatene ala

^x 5.46 Moone Deteronomiyo 18.15-19 ^y 6.4 Paxkwa yaali mathanga oofuneyesesa a aZhudewu. Moone Okuma 12.1-27. Vovi Yesu avenyihwi nlabo nenddo na Paxkwa, hiyo dhiinova Paxkwa eehu nnathabela ovenyihwi muukwani wa Yesu.

etakune?”⁶ (Yesu akohaga dhedhi wi amweeche Filipi, mbwenye mwiinya ahinonaga dhafunigiye wiira.)⁷ Filipi ahaakulaga, wiira: “Naari korowa dha parata mazana meenddi (200)^z kadhinaakwana ogulana yootakuna eng'onong'onove wi athu ala etakune”.

⁸Namasuza aaye mmohiwa, ndina naaye Andire, ddibila a Simawu Peduru, ahimwaaddelaga Yesu, wiira: ⁹“Ohukalavo mwaana muzombwe winna mikaathe mitanu dha sevada^a ni somba biili, ki dhedhi wa athu aatene ala ddi?” ¹⁰Yesu ahiiraga: “Mwawaaddele athu ekaraati”. (Vevale vahikalaga thongwe ejinji.) Athu yahikaraatigi. Alobwanave yaaligivo owaakwana macikwi matanu (5.000). ¹¹Vano Yesu ahithukulaga mikaathe nde, omutamaala Mulugu, waagawela athu yakaraatilege vevale. Ahiiragana emodha-modhave ni somba nde, waagawela wona mwemo athu mwafuneliwa. ¹²Athu aatene egajile, yahirubalaga, Yesu ahawaaddelaga anamasuza aaye, wiira: “Ddoddelani dhoohala dhiwa wi vihithathiliwe yego”. ¹³Yahiddoddelaga dhoohala dhaatedhene dha mikaathe mitanu nde, dhaseelelege ale yajilege, odhaaliha middanga kumi ni miinddi.

¹⁴Vevo athu yoonilege etoonyihedho yootikiniha ele yeerilegena Yesu, yahiraga: “Ebaribareene ola di Namavuhulela awogiwa wi onoodha adhe elabo ya vati”.

¹⁵Yesu aganonile wi anamwinji ale yoofunaga omwihidda wi emuhabihe emwene, ahivenyagavo owelela omwaangoni yeeka.

Yesu onoweedda vadhulu va mahinje munyaza

(*Matwuzhi 14.22-27; Maruku 6.45-52*)

¹⁶Ociguwoni, anamasuza a Yesu yahikelaga onyaza. ¹⁷Egoonile wi ode ohuriba, Yesu kanafiye, yahuubuvelaga omaruwa, ogwela mmwanddeyani odhowaga oKafaranawu wekiwa. ¹⁸Vevale pevo yuulubale yahambeelaga wooba evenyihaga kuluzi yaakathamihaga. ¹⁹Egacapile mwanddeya makilomeeturu owaakwana matanu, naari matanu ni nimohi yahimoonaga Yesu eeddaga vadhulu va mahinje, aaddamelaga mwanddeya weewa, vano aliwa yowoovaga. ²⁰Mbwenye Yesu ahiiraga: “Kamoove. Di miyo”. ²¹Yahimwaakelaga Yesu mmwanddeyani, mowaaguva mwanddeya weewa wahiimelaga seresere ya kobela wadhowigiiwa.

Athu enomusayela Yesu

²²Obebehini wiwa anamwinji ale yahalilege kobela ya nyaza, yahinonaga wi mwanddeya waalivo mmohi baahi. Teto anamwinji ale

^z 6.7 Korowaya yaakwana omulivela muthu alaba mweeri mitanu ni mmohi. ^a 6.9 *Sevada* yaali yooja ya athu oorabula, onafwanafwana ni tirigu. Alabihiwana osasanyana mikaathe, madhiveloya eli wona mahele.

yahinonaga wi Yesu kaavolowilegemo mmwanddeyani ni anamasuuzaa aaye, aliwa yadhowilege wekiwa. ²³Naari ndo mwanddeya dhimohi dhookumela nluwa na Tiberiyasi dhahifiyaga vakukuuve ni mburo oyene athu vajiligiiisu mikaathe, Nabwiya agamutamaale Mulugu. ²⁴Anamwinji ale vooniligiiwa wi Yesu kaalivo, anamasuuzaa aaye naaliweene teto kilivo, athu aatene yahivolowaga mmwanddeyani nde, odhowa oKafaranawu, emusayelaga Yesu.

Yesu dili yooja enavaha egumi

²⁵Vevale athu yahimfwanyaga Yesu kobela ya nyaza, yahimukohaga, wiira: “Namasuuziha, mfiyile alini wuno?” ²⁶Yesu ahawaaddelaga, wiira: “Ebaribareene, ebaribareene ginowuwaaddelani wi nyo kamunagisayelelela mwaha wowiwelelamo etoonyihedho ele, eehi, mbwenye mwaha wi mwahija yooja ofiyedha orubala. ²⁷Kamwihiddege mabasa wi mfwanyee yooja enanoongeya, mbwenye mulabege mabasa wi mfwanyee yooja yoologela, eli yoovaha egumi yoohumala. Vowi miyo, Mwaana a Muthu, dinoovaheni yooja ele, Mulugu Baabi ahigirumeedhiha wi guvaheni”.

²⁸Vevale athu ale yahambeelaga omukoha, yiiraga: “Niire avi wi nilabe mabasa Mulugu enaafuniye?” ²⁹Yesu ahawaakulaga, wiira: “Mulugu mabasa enaafuniye baala: Mmuroromele ole omurumiliye”.

³⁰Aliwa yahimukohaga, wiira: “Munanoonihe etoonyihedho yootikiniha ddi wi noona nuuroromeleni? Munaanda wiirana ddi? ³¹Awale-wale eehu yooja manaa mwiiddeddereni wona Maleba Ootaleleya mulebeliwiwa wi: *‘Owaavaha yooja yadha odhulu wi ejege’*”^b. ³²Yesu ahiiraga: “Ebaribareene, ebaribareene ginowuwaaddelani wi oyene oovahani yooja yadha odhulu, kaali Mozezi, eehi. Ababa boovahani yooja ya ebaribari yowaakwana yadha odhulu. ³³Vowi yooja Mulugu enaveleeliye si eyene ekitile okumela odhulu, enavaha egumi yoohumala wa athu a elabo ya vati”.

³⁴Ale yaaligi vevale yahimulobaga Yesu, wiira: “Nabwiya, munivahege yooja eyo malabo maatene”. ³⁵Yesu ahawaaddelaga, wiira: “Miyo gili yooja enavaha egumi. Muthu oli aatene onadha wa miyo, kadha akanna dala. Aatene enagiroromela, kidha ekanna nthona.

³⁶“Ginowuwaaddelani wi ee, nyo muhugoona, mbwenye kamunagiroromela. ³⁷Aatene Baabi enagivahiiye, enoodha wa miyo. Teto athu aatene enagidheela, kagidha gaakoodda. ³⁸Vowi gihikita okumela odhulu odha wiirana dhoofuna dha ole ogirumile, ehili wiirana dhoofuna dhaaga. ³⁹Yoofuna ya ole ogirumile siila: Gihimurimeelihevo naari mmohi mwa ayene egivahiliye, mbwenye gidhe gaavenyihe muukwani va nlabo noomariha. ⁴⁰Ela teto soofuna ya aBaba wi muthu oli aatene

^b 6.31 Okuma 16.14,15,31; Masaalimu 78.24,25

onamusugwa Mwaana, amuroromela, akalena egumi yoohumala, vano miyo ginoodha gimvenyihe muukwani nlabo noomariha”.

⁴¹ Vevale aZhudewu yahambeelaga waaba mwaha wi Yesu ahiiraga: “Miyo gili yooja ekitile okumela odhulu”. ⁴² Aliwa yoowogaga, yiiraga: “Ola kahuwo Yesu, mwaana a Zhuuze? Babe ni maaye kanaanonile? Ki onawoga addi wi: ‘Miyo gikitile okumela odhulu?’ ” ⁴³ Yesu ahawaakulaga, wiira: “Kamugaabe vikaleliinyu. ⁴⁴ Kalivo muthu onaadhe wa miyo, Baabi ogirumile ahi-mudhiilena; vano miyo ginoodha gimvenyihe muukwani nlabo noomariha. ⁴⁵ Dhihilebiwa mwa anamavuhulela wi: ‘Aatene enoodha ekale oosuuzihiwa ni Mulugu.’” ⁴⁶ Muthu oli aatene onamwiiwa Baabi, asuuzwa wa aliwa, onoodha wa miyo. ⁴⁶ Kalivo muthu omoonile Baabi, ahili ole okumele wa Mulugu; oliye yeeka dimoonile Baabi.

⁴⁷ “Ebaribareene, ebaribareene ginowuwaaddelani wi onagiroromela, ohukanna egumi yoohumala. ⁴⁸ Miyo gili yooja enavaha egumi. ⁴⁹ Awale-wale eenyu yahija manaa mwiiddeedereni, naari ndo yahikwa. ⁵⁰ Mbwenye yooja enawogiimi si eyene yakitile okumela odhulu wi muthu aja ahikwe. ⁵¹ Miyo gili yooja yeegumi ekitile okumela odhulu. Muthu aja yooja ela, onoodha akalena egumi yoohumala. Yooja ela bu mwiili waaga, onaveleeliimi wa athu a elabo yaatene ya vati wi ekalena egumi”.

⁵² Amohi mwa aZhudewu yahambeelaga ovaanyihana vakaleligiisu, yiiraga: “Muthu ola onaande addi onivaha mwiili waaye wi nije?” ⁵³ Yesu ahaakulaga, wiira: “Ebaribareene, ebaribareene ginowuwaaddelani wi akala kamunaaje mwiili wa Mwaana a Muthu ni ong’wa mwazi waaye, kamunaakalena egumi mwa nyo weekiinyu. ⁵⁴ Muthu oli aatene onaaje mwiili waaga ni ong’wa mwazi waaga, ohukanna egumi yoohumala, miyo ginoodha gimvenyihe muukwani nlabo noomariha. ⁵⁵ Vowi mwiili waaga si yooja ya ebaribari teto mwazi waaga si yoong’wa ya ebaribari. ⁵⁶ Muthu oli aatene onaje mwiili waaga, ang’wa mwazi waaga, onakala mwa miyo teto ginakala mwa oliye. ⁵⁷ Baabi ogirumile mugumi, miyo teto gili mugumi mwaha wa Baabi. Mwa mukalelo mmohive, ole onaajeve mwiili waaga, onokanna egumi mwaha wa miyo. ⁵⁸ Ela si yooja ekitile okumela odhulu. Eyene eli yoohiyana ni manaa a awale-wale eenyu yaajiliwa, ekwa. Muthu onaja yooja ela onoodha akalewo okala ni okala”.

⁵⁹ Yesu awogilege dhedhi asuuzihaga mu nyuba ya matugumano^d ya oKafaranawu.

Madhu oovaha egumi yoohumala

⁶⁰ Anamasuuzwa ajinji a Yesu egeewile dhedhi yahiiiraga: “Madhu ala bookukumula. Onaande waarumeedha baani?” ⁶¹ Yesu ahinonaga mmuri-

^c 6.45 Ezaya 54.13 ^d 6.59 *Nyuba dha matugumano* Nda mu ewogelo ya eGerego dheeriwa *sinagoga*. Mabasa eewa kayaali oolobelamoove, naari osuuzamo Malamulo, mbwenye teto yowaathongamo athu yahaaharihamo Malamulo a aZhudewu.

mani mwaaye wi anamasuuz aaye enowaaba wa nde dheewiligiisu. Vano ahaakohaga, wiira: “Enookukumulani ddi? ⁶²Ki mmoona Mwaana a Muthu agwelaga adhowaga wewo waaliye wale muneere avi? ⁶³Muneba wa Mulugu bunavaha egumi, mwiili wa emuthu kunapuriha yego. Madhu guwaaddeliimini, bili muneba ni egumi. ⁶⁴Mbwenye ehikalavo amohi vaari va nyo ehinaroromela dhinawogiimi”. (Vowi Yesu ahaanona wambeela wale ale yahaaromele teto ni ole aampeleke.) ⁶⁵Yesu ahiwelelaga owoga, wiira: “Mwahaya buuyene wuwaaddeliimini wi kavili muthu onaande odha wa miyo, Baabi aahimvaha oliye odha”.

⁶⁶Okuma vevale anamasuuz a jinji a Yesu yahimwihiya, kuhumweeddagana. ⁶⁷Yesu ahaakohaga anamasuuz kumi ni abiili ale, wiira: “Ki nyo teto kamunafuna odhowa?” ⁶⁸Simawu Peduru ahaakulaga, wiira: “Nabwiya, nnadhowe waani? Nyo dinna madhu oovaha egumi yohumala. ⁶⁹Hiyo nnororomela, nihinona wi nyo dili Oweela ookumela wa Mulugu”. ⁷⁰Vevale Yesu ahaakulaga, wiira: “Gahuusakulani nyo kumi ni abiili, kahuwo mwemo? Naari ndo, mmohi vaari va nyo da Ddiyabo”.^e ⁷¹Oliye amuwogaga Zhudasi, mwaana a Simawu a oEsikariyothi. Naari aalive mmohi mwa anamasuuz kumi ni abiili ale, oliye dampelekile Yesu.

Addibila a Yesu kayamuroromele

7 ¹Dhigavirile nda Yesu oweeddeeda murudda wa oGalileya. Kaa-funile weeddela murudda wa oZhudeya, mwaha wi apogo a aZhudewu a wewule yafuna empe. ²Mudhidhi oyo Othabeliwa wa Misasa^f wa aZhudewu, sowi ogali vakukuuve. ³Vano addibila a Yesu yahimwaaddelaga, wiira: “Ovenyewo wuno, odhowe oZhudeya wi anamasuuz aawo wewo naaliweene yoone dhedho dhineriweni. ⁴Ole onafuna ononeya ni athu kaneerana yego mowiipiteya. Vowi nyo muno-wiirana mabasa owinda, mweyoonihe vowooneya vameentoni va athu aatene wi yuunoneni”. ⁵(Sowi addibile naaliweene, kayamuroromela.) ⁶Yesu ahawaaddelaga, wiira: “Mudhidhi waaga kunafiye, mbwenye nyo mudhidhi oli waatene bweenyu. ⁷Elabo ya vati kidha yuwiiddani, mbwenye enagiidda miyo, mwaha wi ginowiirela onamoona wi athu a elabo ya vati dhineeriwa sootakala. ⁸Nyo dhowani omathabelelo. Dhiinova miyo kaginayawo omathabelelowo, mwaha wi mudhidhi waaga kunafiye”. ⁹Yesu agawogile dhedho, ahihalaga oGalileya.

Yesu onodhowa Omathabelelo wa Misasa

¹⁰Egadhowile addibile omathabelelo wa Misasa wule, Yesu teto ahi-dhowagawo. Kaadhowilege mowooneya, mbwenye mowiipiteya. ¹¹Apogo a

^e 6.70 *Ddiyabo* naali ndina nimohi na Sathana. ^f 7.2 *Othabeliwa wa Misasa* waali othabela wa dhoohadda. Moone Levitiku 23.33-43.

aZhudewu yoomusayelaga vamathabelelo vale, ekohanaga, yiiraga: “Mulo-bwana ole oli wuuvi?”¹² Teto vahikalaga onong'ona wujinji owoga dha oliye vaari va anamwinji. Amohi yoowogaga, yiiraga: “Di muthu apama”. Mbwenye amohi yowoiraga: “Eehi, onoviriganih nlogo”.¹³ Naari ndo kaalivo muthu awogaga voweela dha oliye mwaha wowawoova apogo a aZhudewu.

¹⁴Othabela ogali vaari, Yesu ahivolowaga nyuba ya Mulugu wambee-la osuuziha mwemule. ¹⁵Apogo a aZhudewu yahitkinaga, wiira: “Mwaha bwaddi muthu ola winna tthottho dhowinda ahisuuzile?” ¹⁶Yesu ahaakulaga, wiira: “Dhinasuuzihiimi kahuwo dhaaga, dhinadha wa ole ogirumile. ¹⁷Aatene enafuna wiirana dhoofuna dha Mulugu, enoodha enone akala dhinawogiimi sookumela wa Mulugu naari wa miyo meenka. ¹⁸Oyene oneewogela yeeka, oneefunela wiiriha yeeka. Mbwenye onasayela omuriiha ole omurumile, dili a ebaribari, mmurimani mwaaye kamuli yoonyengetha. ¹⁹Mozezi kahuwo oovahileni Malamulo a Mulugu?^g Kavili mmohi mwa nyo onaahariha. Ki munafunela ddi ogipa?” ²⁰Mbwenye anamwinji yahimwaakulaga, wiira: “We ohiddiwe muneba wootakala. Onafuna wuupa baani?” ²¹Yesu ahawaakulaga, wiira: “Giirilena yego emohi baahi, mwaatene otikinaga. ²²Teto nyo munomwiinela mwihima amulobwana naari nigali nlabo na sabuddu. Mozezi ahuulamulani wiira mwawiinelege aniinyu anaalobwana (naari elemelelo eyo ehili yookumela wa Mozezi mbwenye wa awale-wale eenyu ale).^h ²³Akala mwaana onowiineliwa va nlabo na sabuddu wi yaakwanele Malamulo a Mozezi, mwaha bwaddi munatakaleliwa ni miyo voomuyiliha muthu nlabo na sabuddu? ²⁴Kamuthongege vowoona mukalelo wa muthuya, mbwenye muthongege mwa ebaribari, ni mowogoowa”.

Yesu dili Kirixtu ole aroromelihiwe

²⁵Vevale athu amohi a oZheruzalemi yahiiraga: “Ki muthu onamusa-yeliwa wi empe, kahuwo olena? ²⁶Kahuwo olena onawoga voweela va, kalivo onamwiirela yego! Sowi asogoleli ehinona ebaribareene wi oliye di Kirixtu? ²⁷Vowi Kirixtu aroromelihiwe wi adhe, kalivo ononile onaakumiiye. Mbwenye ola aatene nihinona okumelihiye”.

²⁸Vevale Yesu asuuzihaga nyuba ya Mulugu, ahiwogaga moogwe-liha madhu, wiira: “Nyo muhuginona teto okumiliimi muhunonawo. Mbwenye kagidhiile mwa ofuna waaga-waaga. Ole ogirumile da ebaribari. Nyo kammunonile. ²⁹Mbwenye miyo gihimunona mwaha wi gikumele wa oliye, ogirumile di oliye”.

³⁰Vevale athu yoofunaga omwihidda Yesu, mbwenye kaalivo mmohi amukahinyilege, mwaha wi mudhidhi waaye waaligi ohunafiye.

^g 7.19 *Malamulo a Mulugu* enaagiwana malamulo maatene Mulugu yamvahiliye Mozezi wa aZhudewu ehili malamulove kumi. ^h 7.22 *Awale-wale* enaagiwana Abarahamu, Yakobo, ni Ezaaki. Moone Wambeela 17.10; Levitiku 12.3.

³¹ Mbwenye athu ajinji mwa anamwinji yahimuroromela, yowiiraga: “Kirixtu vineeriyee adhe, oneere wiirana dhitoonyihedho dhookwaranya dhedhi mulobwana ola dhiiriliiyena?”

Anamaang'anela enorumiwa omwihidda Yesu

³² AFarizi yahiiwaga onong'ona wa anamwinji yawogaga dha Yesu. Vano aliwa vamohi ni apogo a anamakutha yahaarumaga anamaang'anela a Nyuba ya Mulugu wi yamwihidde. ³³ Vevale Yesu ahiwogaga ni anamwinji, wiira: “Ginokala ni nyo mudhidhi vang'ono, geera ndo ginowelega wa ole ogirumile. ³⁴ Munoodha mugisayelege, mbwenye kamudha mugifwanya. Oneeriimi gakalewo, kamunaande ofiyawo”.

³⁵ AZhudewu yahambeelaga okohana mmohi ni mukwaaye, yiiraga: “Onafuna adhowe wuuvi ohunamfwanyiihuwo? Onafuna adhowe wa aZhudewu ebalaleyele vaari va athu a malogo mamohi? Onafuna aasuuzihege athu oode? ³⁶ Madhu alena enatapulela ddi? Onawoga wi: ‘Munoodha mugisayelege mbwenye kamudha mugifwanya’, teto oni: ‘Oneeriimi gakalewo kamudha mfiyawo’ ”.

Mihinje dha mahinje oovaha egumi

³⁷ Nlabo noomariha na othabela naali noofuneyesesa. Nlabo ndde Yesu ahiimelaga, owoga ni ndhu nootaama, wiira: “Akalavo winna nthona, adhe wa miyo ang'we. ³⁸ Maleba Ootaleleya yiire: ‘Muthu onagiroromela, murima waaye onaakale wona needduuddu a mihinje dha mahinje enavaha egumi’ ”. ³⁹ (Oliye awogaga dha Muneba Woweela athu oomuroromela yaakeliisu. Mudhidhi oyene Muneba Woweela waali ohunadhe, mwaha wi Yesu aaligi ahinadhowe waakela nthithimiho.)

Ogawanyeya wa athu

⁴⁰ Anamwinji egeewile madhu alena, amohi vaari va aliwa yowiiraga: “Ebaribareene muthu ola dili Namavuhulela”.ⁱ ⁴¹ Amohi yoowogaga, yiiraga: “Ola dili Kirixtu aroromelihiwe”. Mbwenye amohiwa yawogaga, yiiraga: “Kirixtu onakumela oGalileya? ⁴² Maleba Ootaleleya kayiire Kirixtu onadheela wa anamabaliwelamo a Davidi, nluwa na oBetelemi, wewo Davidi wakaliye?”

⁴³ Mowindo anamwinji yahigawanyeyaga mwaha wa Yesu. ⁴⁴ Amohi yoofunaga omwihidda mbwenye kaalivo amukahinyilege.

Ohuroromela wa apogo a aZhudewu

⁴⁵ Anamaang'anela a nyuba ya Mulugu yahiwelagaga wa apogo a anamakutha ni wa aFarizi. Aliwa yahaakohaga anamaang'anela ale,

ⁱ 7.40 *Namavuhulela ole* Onani madhu enawoga Zhuwawu 1.21.

wiira: “Mwaha bwaddi mudhe muhumwihiddege?” ⁴⁶ Anamaang'anela yahaakulaga, wiira: “Kanakalegewo onawogaga wona mulobwana ole”. ⁴⁷ Vevale aFarizi yahiiraga: “Sowi ninyeene teto muhunyengethiwa ni mulobwana ole? ⁴⁸ Kalivo naari mmohi mwa hiyo naari aFarizi emuroromele. ⁴⁹ Mbwenye athu bure ale ehinonile Malamulo a Mozezi, booddubeya!”

⁵⁰ Vano Nikodemu, mmohi mwa aFarizi, oyene amusayele Yesu wale, ahaakohaga akwaaye, wiira: ⁵¹ “Malamulo eehu kinarumeedhiha omuthonga muthu nihineewe madhu aaye, nnona dhiiriliye?” ⁵² Aliwa yahaakulaga, wiira: “Teto niweene oli a oGalileya? Odhowe wasayele mMalebani oneere woona wi kavili namavuhulela ookumela oGalileya”.

⁵³ [Vevale athu aatene yahivelelaga mmavade mweewa.]

Mwihiyana ooraruwa

8 ¹ [Yesu ahidhowaga oMwaangoni wa Olivera. ² Ogaasile ahidhowaga nyuba ya Mulugu. Athu aatene yahidhaaga wa oliye, vano ahikaraatigi wambeela waasuuziha. ³ Anamasuuziha a Malamulo vamohi ni aFarizi yahimudhaagana mwihiyana yamwihiddiligiwa araruwaga, omwiimeliha vaari va athu aatene. ⁴ Vano yahimwaaddelaga Yesu, wiira: “Namasuuziha, mwihiyana ola ohiddiwe araruwaga. ⁵ Malamulo a Mozezi enanilamula wi ahiyana ooraruwa wona ola naapege mowaavonya ni mabwe. Nyo muni avi?”] ⁶ Yamukohelaga wi emweeche, emfwanyena mwaha. Yesu ahiworomaga, wambeela oleba vati ni embuno. ⁷ Vowi aliwa yoomukohagave, Yesu ahinuuwaga, wiira: “Vaari veenyu ohunathegege, ambeele omvonya ni nibwe mwihiyana oyo”. ⁸ Ageere ndo ahiwelelaga oworoma dila ya nabiili, olebaga vati. ⁹ Egeewile madhu alena, yahambeelaga ovenyavo mmohi mmohi, wambeela wa apogo ofiyedha oogomihedha; ohalavo Yesu ni mwihiyana ole weekiwa. ¹⁰ Vano Yesu ahinuuwaga omukoha, wiira: “Mwihiyana, athu ale eli wuuvi? Kaavo wuukonile?” ¹¹ Mwihiyana ole ahiiraga: “Kalivo muthu, Nabwiya”. Vano Yesu ahimwaaddelaga, wiira: “Miyo teto kaginookona. Dhowaga, kuwelele othega”.] ^k

Yesu dili waara onavaha egumi

¹² Vevale Yesu ahiwelelaga owoga ni aFarizi, wiira: “Miyo gili waara wa elabo. Ole onagihara kadha eedda muyiihini, mbwenye onoodha akalena waara onavaha egumi yoohumala”.

¹³ AFarizi yahimwaaddelaga, wiira: “Oneyiirela onamoona weeka. Onamoona waawo oyo kahuwo wa ebaribari”. ¹⁴ Yesu ahawaakulaga, wiira: “Naari giyiirelaga onamoona meenka, onamoona waaga bwa ebaribari,

j 8.5 Levitiku 20.10 k 8.11 Madhu ala 8.1-11 kinafwanyeya mmaniivuruni awale.

vowi gihinona okumiliimi teto onadhowiimi. Mbwenye nyo kamunonile okumiliimi, naari onadhowiimi. ¹⁵Nyo munathonga voohariha moobuwelo a omuthu. Miyo kaginamuthonga muthu. ¹⁶Akala ginonthonga, ginathonga mowogoowa, vowi kagili meenka, Baabi ogirumile oli ni miyo. ¹⁷Malamulo eenyu elebiwe wi onamoona wa athu abiili bwa ebaribari. ¹⁸Miyo ginowiyyirela onamoona meenka teto Baabi ogirumile onogirela onamoona”. ¹⁹Vevale aliwa yahimukohaga, wiira: “ABabo eli waani?” Yesu ahiiraga: “Nyo kamuginonile teto aBaba kamwaanonile. Mwahaaginone, mowaanona aBaba”.

²⁰Yesu awogilege madhu alena asuuzihaga mu nyuba ya Mulugu, vakukuuve ni suubi mwalogoleliwa dhooveleela dha athu. Kalivo amwiiddilege, mwaha wi mudhidhi waaye waaligi ohunafiye.

²¹Yesu ahiwelelaga wawaaddela, wiira: “Miyo ginoodhowa. Munoodha mugisayelege, mbwenye munookwela mudhoothegani mweenyu. Onadhowiimi, kamunaande ofiyawo”. ²²Vevale apogo a aZhudewu yahiiraga: “Onafuna eepe, onawoga wi: ‘Onadhowiimi, kamunaande ofiyawo?’ ” ²³Yesu ahiwelelaga wawaaddela, wiira: “Nyo muli a vati va, miyo gili a odhulu. Nyo muli a elabo ela, miyo kagili a elabo ela. ²⁴Miyo guhuwaaddelani wi munokwela mudhoothegani mweenyu. Akala kamunaroromela wi Miyo Gili,¹ munokwela mudhoothegani mweenyu”. ²⁵Vevale aliwa yahimukohaga, wiira: “We oli aani?” Yesu ahawaakulaga, wiira: “Miyo gili eyene guwaaddeliimini okuma omambeeelo. ²⁶Miyo gihikanna dhijinji dhoowoga dha nyo ni wuurunihani dhineerinyu, mbwenye ginawoga dhedho dhiiwiliimi wa ole ogirumile wi gawaaddele athu a elabo ya vati, vowi oliye da ebaribari”.

²⁷Athu ale kayeeweleeemo wi Yesu awogaga dha aBabe. ²⁸Yesu aha-waaddelaga, wiira: “Mwadha mmutomeya Mwaana a Muthu, munoodha munone wi Miyo Gili. Mowindo kagineerana yego mwa meenka, ginawoga dhedho Baabi dhigisuuzihiliye. ²⁹Ole ogirumile, oli ni miyo, kagihiyile meenka, vowi mudhidhi dhaatedhene ginowirana dhoomudhivela”. ³⁰Yesu agawogile dhedhi, athu ajinji yahimuroromelaga.

Ebaribari enowaatapula athu

³¹Vano Yesu ahawaaddelaga aZhudewu yamuroromela, wiira: “Mweera mukalagave mmadhuni aaga, ebaribareene munakala anamasuua aaga. ³²Mowindo munoodha munone ebaribari, vano ebaribari eyo enoodha yuutapuleni”. ³³Aliwa yahiiraga: “Hiyo nili anamabaliwelamo a Abarahamu, okalawene kannakalege adhaari a mmohi. Ki onawogela ddi wi nnoodha nikale ootapuwa?” ³⁴Yesu ahawaakulaga, wiira: “Ebaribareene, ebaribareene gino-

¹ 8.24 *Miyo Gili* thi ndina Mulugu niivahiliye, nneeweya muHeberi: YAHWEH. Moone teto maverisikulu 28, 58. Moone Okuma 3.14.

wuwaaddelani wi ole oneerana yoothega mudhaari a yoothega. ³⁵Mudhaari kanakala mwiimudhini mudhidhi dhaatedhene, mbwenye mwaana dinakala mwiimudhini mudhidhi dhaatedhene. ³⁶Eera akala Mwaana onootapuleni, munoodha mukale ootapuwa-mutapuwelo. ³⁷Gihinona wi muli anamabaliwela-mo a Abarhamu, naari ndo munafuna ogipa, mwaha wi mmirimani mweenyu kamunarumeedha madhu aaga. ³⁸Miyo ginawoga dhedho aBaba dhigoonihiliwa, mbwenye nyo muneerana dhedho dhiiwiliinyu wa babiinyu”.

³⁹Aliwa yahiiraga: “Hiyo, babiuhu di Abarhamu”. Yesu ahawaakulaga, wiira: “Mwahaakale ahima a Abarhamu, mweerege wiirana dhedho Abarhamu dheeriyena. ⁴⁰Mbwenye vano munosayela ogipa, naari ngali muthu onowaa-ddelani ebaribari yiiwiliimi wa Mulugu. Abarhamu kaadhe eerana dhowindo. ⁴¹Nyo muneerana dhedho babiinyu dhineeriyena”. Aliwa yahimwaakulaga, wiira: “Hiyo kanili ahima a mmamaruwoni. Nihikanna Babiuhu mmohi, oli Mulugu”. ⁴²Yesu ahiiraga: “Mulugu ahaakale Babiinyu, mweerege ogidhivela, mwaha wi gikumele wa Mulugu, dhiinova gili wuno. Kagidhiile ni owodha wa miyo meenka, mbwenye oliye digirumile. ⁴³Mwaha bwaddi kamuneeweelamo dhinawogiiimi? Sowi kamunaakwaniha wiiwa madhu aaga. ⁴⁴Nyo muli ahima a Ddiyabo^m oli babiinyu, muneerana dhedho babiinyu dhinafuniye. Oliye aalive namapa okumela omambeeelo. Onowiiddana ni ebaribari, mwaha wi mwa oliye kamuli ebaribari. Oratha bu mukalelo waaye, vovi oliye namaratha, baabi a anamaratha aatene. ⁴⁵Mbwenye mwaha wi ginawoga ebaribari, kamunagiroromela. ⁴⁶Ogoonilena yoothega vaari va nyo baani? Akala ginawoga ebaribari, muhunagirumeedhela ddi? ⁴⁷Ole oli a Mulugu, onorumeedha madhu a Mulugu. Mbwenye nyo kamunarumeedha Mulugu dhinawogiiye, vovi kamuli aaye”.

Yesu onowoga dha Abarhamu

⁴⁸Amohi mwa aZhudewu ale yahimwaakulaga Yesu, wiira: “Dhinawogiihu kahuwo ebaribari, neeraga wi oli muSamariya ohuhiddiwa ni muneba wootakala?” ⁴⁹Yesu ahawaakulaga, wiira: “Miyo kagihiddiwe ni muneba wootakala. Ginowariha Ababa, vano nyo munogivevusa. ⁵⁰Miyo kagineesayeleda meenka oriihiwa. Ohukalawo mmohi onagisayeleda oriihiwa, oliye dili namathonga oogomihedha a dhaatedhene. ⁵¹Ebaribareene, ebaribareene ginowuwaaddelani wi muthu oneeweleda madhu aaga, kadha akwa”. ⁵²AZhudewu ale yahimwaaddelaga, wiira: “Vano nihinona we ohuhiddiwa ni muneba wootakala. Abarhamu ohukwa, anamavuhulela aatene ehikwa, we oni: ‘Muthu eeweleda madhu aaga kadha akwa’. ⁵³We ohumukwaranya babiuhu Abarhamu? Oliye ohukwa wona teto anamavuhulela ehikwa. Ki we onoobuweleda wi oli aani?”

⁵⁴Yesu ahawaakulaga, wiira: “Akala ginowiriiha meenka, nriho naaga theebeweene. Ohukalawo onagiriiha, eli aBaba, ayene nyo munawiriinyu

^m 8.44 *Ddiyabo* naali ndina nimohi na Sathana.

di Mulugu eenyu. ⁵⁵Nyo kamwaanonile, mbwenye miyo gihaanona, vovi gaheerege kagaanonile gaakale namaratha wona nyo. Mbwenye gihaanona teto ginowiiwelela madhu ewa. ⁵⁶Babiinyu Abarhamu ahiteyela wi oone nlabo naaga. Ahoona ebaribareene nigafiyile, ahigagalala”. ⁵⁷Vevale aZhudewu ale yahimukohaga, wiira: “Yaaka dhaawo kadhinaakwane makumi matanu (50), omoonile addi Abarhamu?” ⁵⁸Yesu ahawaakulaga, wiira: “Ebaribareene, ebaribareene ginowuwaaddelani wi Abarhamu ahinabaliwe, Miyo Gili”. ⁵⁹Vevale aZhudewu ale yahaaddoddaga mabwe wi emvonyena. Mbwenye Yesu ahiipitaga nuwindo okuma mu nyuba ya Mulugu.

Yesu onomuyiliha mulobwana oohoona

9 ¹Yesu eeddaga, ahimoonaga muthu oohoona woobaliwana. ²Anamasuuzaa aaye yahimukohaga, wiira: “Namasuuziha, othegile baani wi muthu ola abaliwe ahoonaga? Othegile di oliye naari ababiinya?” ³Yesu ahawaakulaga, wiira: “Kahuwo wi oliye dithegile naari ababiinya. Mbwenye obaliwe oohoona wi Mulugu oonihe owodha wa mabasa aaye, mwa nde dhineereye mwa oliye. ⁴Veva viliwa mutana enofuneya nihiddege mabasa a ole ogirumile. Mahiyu enoodha muthu vihinaakwanihigiye ohidda mabasa. ⁵Viliimi elabo ya vati vano, gili waara wowaamoneya athu aatene”.

⁶Yesu agawogile dhedho, ahitaperaga mare vati okanddana theya, odholiha maddoguya mmeentoni mwa muthu oohoona ole, ⁷omwaaddela, wiira: “Dhowa wasuusule onthiyani na Silowe”.ⁿ (Enatapulela wi: Oorumiwa.) Muthu ole ahidhowaga osuusula, owelawo oonaga.

⁸Vano amwaaddamani aaye ni amohi yamoonesa wale aloba-lobaga, yahiiraga: “Ola kahuwo olene akaraatesa alobaga?” ⁹Amohi yoorumee-dhaga, yiiraga: “Di oliyeene”. Amohiwa yowiiiraga: “Eehi, onooliganana”. Mbwenye mwiinyeene ahiiraga: “Ee, di miyeene”. ¹⁰Aliwa yahimukohaga, wiira: “Ki meento aawo efuguwe addi?” ¹¹Oliye ahaakulaga, wiira: “Muthu oneeriwa Yesu dikanddile theya ni mare, odholiha maddoguya mmeentoni mwaaga. Ogaaddela, wiira: ‘Dhowa, wasuusule onthiyani na oSilowe’. Miyo odhowa osuusula, vano ginowoona”. ¹²Athu ayo yahimukohaga, wiira: “Muthu oyo oli wuuvi?” Oliye wiira: “Kaginonilewo”.

aFarizi enomukoha mulobwana ooyilihiwa ole

¹³Anamwinji yahimuthukulelaga mulobwana aali oohoona ole wa aFarizi. ¹⁴Naaligi nlabo na sabuddu Yesu nakanddiligiye theya ni mare amuyilihana muthu ahoona ole. ¹⁵Vano aFarizi naaliweene teto yahimukohaga muthu ole,

ⁿ 9.7 *Nthiya na Silowe* thi nthiya nimohi na oZheruzalemi. Thi nendde nnaromoliwa wa Mamwene a Nabiili 20.20; Koronika a Nabiili 32.30.

wiira: “We, woonile addi?” Oliye ahawaaddelaga, wiira: “Agidholihile maddo-gu mmeentoni mwaaga, miyo odhowa osuusula, vano ginwoona”. ¹⁶AFarizi amohi yahiiiraga: “Mulobwana oyo kahuwo ookumela wa Mulugu, mwaha wi kanahariha nlamulo nnawoga dha sabuddu”. Mbwenye amohiwa yowiiiraga: “Dhinowaandeya namathega wiirana dhitoonyihedho dhowindo?” Mowindo vahikalaga ogawanyeya.

¹⁷Vano aFarizi yahiwelagala omukoha muthu aali oochoona ole, wiira: “Ki weevo onera avi dha oliye, vuwoonihiliye?” Muthu ole ahaakulaga, wiira: “Oliye di namavuhulela”. ¹⁸Mbwenye apogo a aZhudewu kayaroromele wi muthu ole wale koono, dhiinova onowoono, yahifiyedhaga wawiiithaniha ababiinya. ¹⁹Vano yahaakohaga, wiira: “Nyo, mwiire ola di mwaani-nyu? Obaliwe ahoonaga? Ki dhiireyile avi wi vano oonege?” ²⁰Ababiinya yahaakulaga, wiira: “Enoniliihu sowi ola di mwaanihu, obaliwe ahoonaga. ²¹Mbwenye kannonile dhiireyile wi dhiinova oonege naari omuyilihile. Mmukohe mwiinya, oliye di pogweene, onowaanda owoga yeeka”. ²²Ababiinya yawogelege ndo mwaha wi yawoovaga apogo a aZhudewu. Vowi aliwa yahipanganela wi akalawo muthu onaakulele wi Yesu dili Kirixtu aromelihiwe, emwiigare mu nyuba ya matugumano. ²³Mwahaya buuyene ababiinya yawogeligiwa, yiira: “Di pogweene, mmukohege mwiinya”.

²⁴Vevo apogo a aZhudewu yahimwiithanaga dila ya nabiili muthu aali oochoona ole, omwaaddela, wiira: “Omoove Mulugu, owooge ebaribari. Hiyo nihi-nona wi muthu ole namathega”. ²⁵Oliye ahawaakulaga, wiira: “Miyi kaginonile akala oliye namathega. Enoniliimi sowi wale kagoona, dhiinova ginwoona”. ²⁶Aliwa yahimukohaga, wiira: “Oliye owiirilena avi oofugulaga meento?” ²⁷Oliye ahawaakulaga, wiira: “Guhuwaaddelani wale, nyo kamunarumee-dha. Ki munafunela ddi wiiwa dila biili-biili? Ninyeene teto munafuna mukale anamasuuzi aaye?” ²⁸Vevale aliwa yahimuruwanaga, wiira: “Namasuuzi aaye di we. Hiyo nili anamasuuzi a Mozezi. ²⁹Nihinona wi Mulugu ahiwoga ni Mozezi. Mbwenye dha mulobwana ola, kannonile odheeliye”. ³⁰Muthu ole ahawaakulaga, wiira: “Vinatikiniha fivevo: Nyo kamunonilewo odheeliye, naari ndo ohuyiliha meento aaga. ³¹Nihinona wi Mulugu kanawiiwa anamathega, mbwenye oliye onamwiiwa ole onamuriiha, eeragana ofuna waaye. ³²Okuma omapaddusiwelo wa elabo, kanneewege wi ohukalawo amoonihilege muthu abaliwe ahoonaga. ³³Mulobwana ole aheere ahikumela wa Mulugu, kaandega wiirana yego”. ³⁴Aliwa yahimwaakulaga, wiira: “We wabaliwe mudhoothegani. Onafuna onisuuzehege?” Egawogile ndo yahimwiigaragavo.

Ohoona mwa muneba

³⁵Yesu ageewile wi apogo a aZhudewu ehimwiigara muthu ole mu nyuba ya matugumano, agamfwanyile, ahimukohaga, wiira: “We onomu-

◦ 9.24 Naari wi: *Olibele mu ndina na Mulugu.*

roromela Mwaana a Muthu?” ³⁶Oliye ahimwaakulaga, wiira: “Nabwiyani, Mwaana a Muthu oyo onamuwogiinyu baani wi gimuroromele?” ³⁷Yesu ahimwaaddelaga, wiira: “Ohumoono. Mwaana a Muthu di oyene onawoga ni we”. ³⁸Oliye ahimwaakulaga, wiira: “Nabwiyani, ginororomela”. Ageere ndo, ahikokoraga omweebedha Yesu.

³⁹Yesu ahiiraga: “Gidheele wi gaathonge athu aatene a elabo ela, oohoono gawoonihege, vano owoona gihawoonihege”. ⁴⁰AFarizi amohi yaaligi vakukuuve ni oliye, egeewile dhedhi yahimukohaga, wiira: “Sowi onawoga wi nihiyeene nili oohoono?” ⁴¹Yesu ahiiraga: “Mwahaakale oohoono, kamwakanne muladdu. Mbwenye munawoga wi: ‘Nnowoono’, muladdu weenyu ohukalawoove”.

Musibe wa nikola na mabila

10 ¹Yesu ahiiraga: “Ebaribareene, ebaribareene ginowuwaaddelani wi ole ohunavolowela vamulago va nikola na mabila, agwelela cinga epaddi emoheene, oyo mbava, namapa. ²Ole onavolowela vamulago dili makambuzi mwiinya a mabilaya. ³Oliye amuruma namaang’anela ofugula mulago, onowiithana ndina na kadda nibila teto onowaasogolela waadhowana ode, mwaha wi mabila ale ehinona ndhu naaye. ⁴Aakumiha mabila ale maatene, onosogola mabilaya omuharaga, vovi ehinona ndhu naaye. ⁵Ohumunoniliisu kinamuhara, mwaha wi kinonile ndhu na muthu ole”.

⁶Yesu ahaawogelaga musibe ola mbwenye aliwa kayeewelegeemo dhawaaddeligiye.

Yesu dili makambuzi apama

⁷Vano Yesu ahawaaddelaga dila ya nabiili, wiira: “Ebaribareene, ebaribareene ginowuwaaddelani wi miyo gili mulago vinavolowela mabila. ⁸Aatene yadhiile miyo gihinadhe, ambava, anamapa, mabilaya kayawiiwelele. ⁹Miyo gili mulago. Ole onavolowela wa miyo onoodha avulumuwe. Onoodha avolowe, akume, afwanye thongwe. ¹⁰Mbava onadheela wiiya, opa ni obwanyula. Vano miyo gidheele waavaha egumi, egumiya yowaakwanela.

¹¹“Miyo gili makambuzi apama. Makambuzi apama onovelela egumi yaaye mwaha wa mabila aaye. ¹²Namalaba kahuwo makambuzi oli mwiinya a mabila. Mowindo oona miji dhidhaaga onowaahiya mabilaya othawa, vano miji ndo dhinowaahiddavo mabila mamohi, mamohiwa enomwadheya. ¹³Namalaba onoothawa mwaha wi onaharavo oliveliwa baahi, kanapwatha dha mabilaya. ¹⁴Miyo gili makambuzi apama. Mabila aaga gihaanona teto aliwa ehiginona ¹⁵wona Baabi muginoneliye, miyo teto gihimunona Baabi. Mwa eyo ginovelela egumi yaaga wa mabila aaga. ¹⁶Gihikanna mabila mamohi ehili a nikola nddi. Ayene enofwanelelele waasogolela. Enoodha yiiwe ndhu naaga teto enoodha ekale a nikola nimohive vano ekalena makambuzi mmohi baahi.

¹⁷“Baabi munagidhiveleliye, sowi ginoveleela egumi yaaga wi gidhe gikalena egumiya dila biili. ¹⁸Kalivo muthu onaagaake egumi yaaga ela, ginoveleela meenka. Gihikanna owodha wooveleela egumi yaaga teto owodha wookalana egumiya dila biili. Olamula wula gaakelile wa aBaba”.

¹⁹Mulogo wa aZhudewu ogeewile ndo, wahiwelela ogawanyeya. ²⁰Aj-nji mwa aliwa yowiiraga: “Ohukanna muneba wootakala, ohusavuwa. Mwaha bwaddi munamvuruwaniinyu?” ²¹Mbwenye amohi yowiiraga: “Madhu alena kahuwo a muthu oohiddiwa ni muneba wootakala. Mineba dhootakala dhinowaanda ofugula meento a aliba ohoona?”

AZhudewu enomukoodda Yesu

²²OZheruzalemi wahikalaga othabela wooveleliwa Nyuba ya Mulugu. Waaligi mudhidhi wooddiddila. ²³Yesu aaligi nyuba ya Mulugu mukodde mweeriwa Nikodde na Salomawu. ²⁴Apogo a aZhudewu yahimwaapee-laga, omukoha, wiira: “Wuwaanganyedha weehu onaamale alini? Akala oli Kirixtu ole aroromelihiwe, onaaddele mowiiweya”. ²⁵Yesu ahawaaku-laga, wiira: “Guhuwaaddelani wale, mbwenye kamunaroromela. Mabasa ginawiiriimina mu ndina na aBaba, baayene enagiirela onamoona. ²⁶Nyo kamunaroromela mwaha wi kamuli a nikola naaga. ²⁷Mabila aaga eno-wiwa ndhu naaga. Miyo gihaanona, aliwa enogihara. ²⁸Ginowaavaha egumi yoohumala teto kidha erimeela. Kavili muthu onagaake mmadani mwaaga. ²⁹ABaba egivahile mabila ayo enowaakwaranya athu aatene, kalivo onaande wawaaka mmadani mweewa. ³⁰Miyo ni Baabi nili mmohi baahi”.

³¹AZhudewu ale yahiddoddaga mabwe wi emvonyena dila ya nabiili. ³²Yesu ahaakohaga, wiira: “Guhuwoonihani mabasa apama majinji Baabi yagirumiliye wiirana. Ki mwa mabasa alena enafuneliinyu ogivonyela ni mabwe baavi?” ³³AZhudewu ale yahimwaaikulaga, wiira: “Kannafuna wuuvonya ni mabwe mwaha wa mabasa apama, eehi, mbwenye mwaha woomunyemula Mulugu. We oli muthu bure, onowiyiira Mulugu”. ³⁴Yesu ahawaakulaga, wiira: “MMalamuloni mweenyu kamulebiwe wi Mulugu ahiira: ‘Nyo muli amilugu?’” ³⁵Maleba Ootaleleya yaawogiliye kidha ethimihiwa. Akala Maleba mamohive ayene enowawiira amilugu ale yarumihedhiwe Madhu a Mulugu, ³⁶ki giwoge ddi dha ole Baabi ompe-lekiliye amuruma mwiilaboni? Vano munagisumelela ddi mwiiraga ginonyemula mwaha wi gihiira: ‘Gili Mwaana a Mulugu?’ ³⁷Akala kagi-neerana mabasa aBaba egivahiliwa, kamugiroromele. ³⁸Mbwenye akala ginowiirana mabasa ayo mwa ebaribari, roromelani, naari miyo muhugi-roromelaga. Vano muneere onona moohaanganyedha wi Baabi oli mwa miyo teto miyo gili mwa Baabi”.

³⁹Vevale aZhudewu ale yahixixaga wi emwihidde Yesu dila emohiwa, mbwenye oliye ahaathawaga.

⁴⁰Vano ahiwelelaga kobela ya mwihinje Zhordawu, mburo Zhuwawu wabathizesiye vowambeela, okala wewo. ⁴¹Athu ajinji yoofiya wa oliye, owogaga, yiiraga: “Zhuwawu keerilena etoonyihedho naari emohi, mbwenye dhaatedhene dhawogiiye dha muthu ola seebaribari”. ⁴²Vevale athu ajinji yahimuroromela Yesu.

Okwa wa Lazaro

11 ¹Vahikala muthu mmohi, ndina naaye Lazaro, oyene abulela. Aali a nluwa na oBetaniya, owaniwa Mariya ni ddibile Maarata. ²Mariya oyo di ole amukuthulele makura oonukwela Nabwiya manyalo aaye,⁹ amuhuhuraga ni nthithi naaye. Lazaro abulela aali murogoriye. ³Vano arogoriye ale yahirumihaga muselu wa Yesu omwaaddela, wiira: “Nabwiya, ole onamudhiveliinyu muredda”. ⁴Yesu veewiligiiye dhedho, ahiiraga: “Oreda oyo kahuwo wookwana, mbwenye dhiireyile wi Mulugu athithi-mihiwe teto wi Mwaana a Mulugu athithimihiwe mwaha wa oreda oyo”.

⁵Yesu oomudhivela Maarata ni ddibile Mariya ni Lazaro. ⁶Naari ndo Yesu veewiligiiye dha oreda oyo, ahivireliwa malabo meenddi vamburoni vaaligiye. ⁷Vevale ahawaaddelaga anamasuuzaa aaye, wiira: “Ndowneni niwelele oZhudeya”. ⁸Anamasuuzaa aaye yahiiiraga: “Namasuuziha, dhiinoveva apogo a aZhudewu yoofuna wuuvonyani ni mabwe, vano munafuna muwelele wewo?” ⁹Yesu ahawaakulaga, wiira: “Mutana kwinna mawora kumi ni meenddi? Muthu oli aatene oneedda mutana, kanakwakwathuwa, mwaha wi onowoona waara wa elabo ela. ¹⁰Mbwenye oneedda mahiyu, onokwakwathuwa mwaha wi mwa oliye kamuli waara”.

¹¹Ageere ndo ahawaaddelaga, wiira: “Lazaro, owaandanana eehu, ohugona, mbwenye ginadhowa wewo gamvenyihe”. ¹²Vevale anamasuuzaa aaye yahimwaakulaga, wiira: “Nabwiya, akala onoogona, oneere ovulu-muwa”. ¹³(Aliwa yoobuwelaga wi Yesu awoga dha kove bure, mbwenye awogaga dha okwa wa Lazaro.) ¹⁴Vano Yesu ahawaaddelaga mowiiweya, wiira: “Lazaro ohukwa. ¹⁵Mbwenye miyo ginohagalala mwaha wi kagaali wewo, wi muroromele. Dhiinova ndoweni wewo namoone”. ¹⁶Vevale Tome, eethaniwa Ddiddimu,^r ahawaaddelaga anamasuuzaa akwaaye, wiira: “Ndowneni vamohi ni Namasuuziha, ndo nneere okwa ni oliye”.

Yesu dili ovenya muukwani ni egumi

¹⁷Yesu agafiyile oBetaniya, amfwanyilege Lazaro agalogohiwe egavirile malabo mannayi. ¹⁸(Betaniya alapelane ni Zheruzalemi vakukuuve ma-

⁹ 11.2 Moone Zhuwawu 12.3; Matewuzhi 26.6-7; Maruku 14.3 ^r 11.16 Ddiddimu enatapulela *anapata*.

kilomeeturu maraaruu. ¹⁹Mwaha wowaaddamana wula, aZhudewu ajinji yahidhowaga wa Maarata ni Mariya wi yaatodole mwaha wa okwa wa murogoriwa.)

²⁰Vevale Maarata ahiiwaga wi Yesu onoodha, ahidhowaga omwaake-la, mbwenye Mariya ahihalaga vaade. ²¹Maarata ahimwaaddelaga Yesu, wiira: “Nabwiya, mwahaakale wewuno, murogoraga kaakwe. ²²Mbwenye gihinona wi naari dhiinoveva, dhaatedhene dhinaamulobigiinyu Mulugu, oliye oneere wuuvani”. ²³Yesu ahimwaaddelaga, wiira: “Murogoriyo oneere ovenya muukwani”. ²⁴Maarata ahiiraga: “Gihinona wi onoodha avenyihwe muukwani, athu aatene yadha evenyihwaga muukwani va nlabo noomariha”. ²⁵Yesu ahimwaaddelaga, wiira: “Miyo gili ovenya muukwani ni egumi. Ole onagiroromela, naari akwe, onoodha akalewo. ²⁶Oli aatene oliwo agiroromelaga, kadha akwa. We onororomela dhedhi?” ²⁷Oliye ahimwaakulaga, wiira: “Ee, Nabwiya, goororomela, ginororomelave wi nyo muli Kirixtu aroromelihiwe, Mwaana a Mulugu, oyene aadhe mwiilaboni ya vati”.

Yesu onowundda

²⁸Maarata agawogile dhedhi, ahimwiithanelaga vowihivale ddibile Mariya, omwaaddela, wiira: “Namasuuziha ohufiya, onowuwiithana”. ²⁹Mariya ageewile madhu ala, ahivenyaga mowaaguva, odhowa vaaligi Yesu. ³⁰Yesu aaligi ahinafiye muluwani mule, mbwenye eemeli-lege vamburoni vagumaniligiiye ni Maarata. ³¹AZhudewu yaaligi mba emutodolaga Mariya, egamoonile wi ohuvenya mowaaguva akuma, yahimuharaga. Yoobuwelaga wi onadhwa omasiye anddege.

³²Mariya ahidhowaga vaaligi Yesu, agamoonile, ahitongwelaga vama-nyaloni a Yesu, wiira: “Nabwiya, mwahaakale wewuno, murogoraga kaakwe”. ³³Yesu agamoonile Mariya anddaga teto aZhudewu yaadhili-giiyena yiinddaga, ahikubanyaga vajinji teto ahukuuwaga mmurimani. ³⁴Vevale Yesu ahaakohaga, wiira: “Mmulogohile wuuvi?” Aliwa yahiiiraga: “Nabwiya, ndoweni moonewo”. ³⁵Yesu ahunddaga. ³⁶Vevale aZhudewu ale yahiiiraga: “Ee, ebaribareene oomudhivela”. ³⁷Mbwenye amohi vaari va aliwa yowiiiraga: “Muthu ola kahuwo olene amoonihile oohoona ole? Kaakwanihe ohiiha wi Lazaro ahikwe?”

Yesu onomvenyiha Lazaro muukwani

³⁸Yesu ahivelelaga wukuuwa mmurimani, ofiya onsiyeni wule, naali nikungu nafugiwe vamavoloweloviwa ni nibwe nuulubale. ³⁹Vano ahiiraga: “Mvenyihevo nibwe nddo”. Maarata, murogora a marafula ole, ahimwaaddelaga Yesu, wiira: “Nabwiya, ohambeela onukwa, vovi ohulogelamo malabo mannayi”. ⁴⁰Yesu ahimwaakulaga, wiira: “Kagu-waaddele wi waroromela onowoona nthithimiho na Mulugu?” ⁴¹Vano

athu yahivenyihagavo nibwe ndde. Yesu ahisugwaga odhulu, wiira: “Babani, ginowuutamalelani mwaha wi muhugiiwa. ⁴²Gihinona wi munogiiwa mudhidhi dhaatedhene. Mbwenye giwogele dhedhi mwaha wa anamwinji eli va yaande oromela wi nyo digirumile”. ⁴³Ageere ndo ahimwiithanaga ni ndhu nootaama, wiira: “Lazaro, kakumela ode!” ⁴⁴Vevale muthu ole akwile ahikumaga, meddo ni madada dhigali dhooohuruwedhiwadhene ni middiddi. Kove yaaye egakuneeliwe ni leeso. Yesu ahawaaddelaga athu yaaligi vevale, wiira: “Mukunuuleni, mmwihiye adhowege”.

Opanganela wi empe Yesu

(*Matewuzhi 26.1-5; Maruku 14.1-2; Luka 22.1-6*)

⁴⁵AZhudewu ajinji yadhiilege ni Mariya, egoonile dheerilege Yesu, yahimuroromelaga. ⁴⁶Vano amohi yahidhowaga wawaaddela aFarizi dhedho dheerilegena Yesu. ⁴⁷Vevale apogo a anamakutha ni aFarizi yahiithanilhaga Nikuru nuulubale na apogo a aZhudewu, waakoha, wiira: “Veva niirevo avi? Mulobwana ola onowiirana dhitoonyihedho dhijinji. ⁴⁸Namwihiya oliye, athu aatene eneerege omuroromela, mowindo aRoma enoodha ebwanyule mburo weehu woweela ni mulogo weehu”.

⁴⁹Vevale mmohi mwa aliwa, ndina naaye Kayifa, oyene aali musogoleli a anamakutha a yaaka elene, ahawaaddelaga, wiira: “Nyo kamunonile yego. ⁵⁰Kamuneeweelamo wi yaali pama muthu mmohi aakwele athu aatene, ohiya wi mulogo waatene onoongeye”. ⁵¹(Kayifa kaawogile dhedhi mwa yeeka. Oliye vookala musogoleli a anamakutha a yaaka elene, avuwihaga mutheenga wa Mulugu wi Yesu eere okwela nlogo na aZhudewu. ⁵²Ehili okwelave nlogo nddi teto aakwele ahima a Mulugu ebalaleyele mwiilaboni ya vati wi aataganyihedhe aatene ekale mulogo mmohi baahi.)

⁵³Wambeela nlabo nendde apogo a aZhudewu yahipang'anelaga wi empe. ⁵⁴Mowindo Yesu kedda voweela vaari va aZhudewu. Ahivenyagawo, odhowa elabo yaali vakukuuve ni kokola, murudda oneethaniwa Efarayimu, okala wewo vamohi ni anamasuuzaa aaye.

⁵⁵Othabela wa Paxkwa^s a aZhudewu waaddamelaga, athu ajinji ookumela mmavade, yahidhowaga oZheruzalemi, wiirihedha elemeelelo ya wiyeeliha. ⁵⁶Yoomusayelagave Yesu wewule. Vatugumaniligiisu mu nyuba ya Mulugu yookohanaga mmohi ni mukwaaye, yiiraga: “Munoobuwela avi? Oliye oneere odha omathabelelo wuno?” ⁵⁷Apogo a anamakutha ni aFarizi yahilamulaga, wiira: “Ole onaanone oli Yesu, anaaddele wi namwihidde”.

^s 11.55 *Othabela wa Paxkwa* yaali mathanga oofuneyesesa a aZhudewu. Moone Okuma 12.1-27. Vowi Yesu avenyihiwe nlabo nenddo na Paxkwa, hiyo dhiinova Paxkwa eehu nna-thabela ovenyihiwa muukwani wa Yesu.

Yesu onokuthuleliwa makura
(*Matewuzhi 26.6-13; Maruku 14.3-9*)

12 ¹Egahalile malabo matanu ni nimohi wi ofiye Othabela wa Paxkwa, Yesu ahifiyaga oBetaniya, wewo wakala Lazaro, ole Yesu amvenyihiliye muukwani. ²Yahimusasanyedhelaga yooja Yesu. Maa-rata owawimelelaga, Lazaro aali mmohi aaligi vamajelo ni oliye. ³Vano Mariya ahithukulaga meya niituru na makura oonukwela a mutheengo wookwima, eneriwa naarudu. Okuthulelaga manyalo a Yesu, waahuhuraga ni nthithi naaye. Mbamwa mwahidhaalaga onukwela wa makura ale. ⁴Mbwenye Zhudasi a oEsikariyothi, mmohi wa anamasuza a Yesu, oyene aampeleke, ahiiraga: ⁵“Mwaha bwaddi makura ala kigulihiwe korowa dha parata dhowaakwana mazana maraaru (300),^t nda dhivahiwa athu oorabula?” ⁶Yamuwogihaga ndo kawaali mwaha wowaakubanyedha oorabula, mbwenye mwaha wi oliye aali mbava. Oliye dalogolela nthumba na korowa, wiiyagamo. ⁷Yesu ahiiraga: “Omwihiyeye, aalogolele makura ala ofiyedha nlabo na ologohiwa waaga. ⁸Oorabula munaakalegena mudhidhi dhaatedhene,” mbwenye miyo kaginaakalege ni nyo mudhidhi dhaatedhene”.

Apogo a anamakutha enopanganela dha ompa Lazaro

⁹AZhudewu ajinji egeewile wi Yesu oli oBetaniya, yahidhowaga wewo. Kayadhowegegewo mwaha wa Yesu baahi teto yadhewelegewo wi yamoone Lazaro, ole Yesu amvenyihiliye muukwani. ¹⁰Mowindo apogo a anamakutha yahipanganelaga wi teto empe Lazaro, ¹¹vowi mwaha wa Lazaro ola aZhudewu ajinji yookuma mwa asogoleli eewa, omuroromelaga Yesu.

Yesu onovolowa muZheruzalemi ni ovuwa
(*Matewuzhi 21.1-11; Maruku 11.1-11; Luka 19.28-40*)

¹²Omenseloni wiwa, anamwinji yadheelege othabela, egeewile wi Yesu onofiya muZheruzalemi, ¹³yahithukulaga mijindda dha kanjesa, okuma wi yamwaakele, ekuwaga, yiiraga:

“Hozana!”

Ooreelihiwa di ola onadha mu ndina na Nabwiya,^w
ola oli Mwene a Ezarayeli!”

¹⁴Vano Yesu ahimfwanyaga mwaana a buuru, omugwela wona muna-gwogela Maleba Ootaleleya, yiiraga:

^t 12.5 Korowadha dhowaakwana omulivela muthu alaba yaaka. ^u 12.8 Moone Deteronomiyo 15.11 ^v 12.13 Hozana mu ewogelo ya eHeberi enatapulela *Nabwiya nivulumuseni*, naari wi: *Athithimihiwe*. ^w 12.13 Masaalimu 118.25-26

15 “*We, nluwa na Ziyoni,^x ohoove.
Kamwiing'ane, Mwene aawo onoodha,
okaraatile va mwaana a buuru*”.^y

16 Mudhidhi olene anamasuza aaye kayanonelemo dhego nde. Mbwenye Yesu agavenyihwe ni nthithimiho, aliwa yahambeelaga ononelamo wi dhego nde dhalebiwe dhamuwoga oliye teto dhego nde dhahimwiireyela.

17 Anamwinji yaaligi ni Yesu vevale vamvenyihiligiye Lazaro muukwani, amwiithana munsiyeni mule, anamwinji ale yahivelelaga wiirela onamoono dhooniligiwa. 18 Mwaha wi yahiiwa wi Yesu ahiiriha etoonyihedho ele, athu ajinji yahidhowaga wi yamwaakele. 19 Vevale aFarizi yahambeelaga waaddelana, yiiraga: “Kanddoddilevo yego. Keeng'anani, athu aatene enomuthamagela”.

AGerego enomusayela Yesu

20 Vahikalaga aGerego amohi vaari va ayene yadhowilege omathabelelo wule omweebedha Mulugu. 21 Aliwa yahidhowaga wa Filipi, (aali a nluwa na oBetsayida, murudda wa oGalileya,) aliwa omuloba, wiira: “Babani, kamwiirena, nnafuno nimoone Yesu”. 22 Filipi ahimwaaddelaga Andire, vevale Andire vamohi ni Filipi yahidhowaga omwaaddela Yesu. 23 Yesu ahawaakulaga, wiira: “Ohufiya mudhidhi wi Mwaana a Muthu athithimihiwe. 24 Ebaribareene, ebaribareene ginowuwaaddelani wi bewu ya namudhe yaahimorela vatheyani ekwa, enakala emohive baahi. Mbwenye yakwa, enovaha dhoovaha dhijinji. 25 Ole onadhivela egumi yaaye, onoyeleela, mbwenye ole oneeddana ni egumi yaaye mwiilaboni mu, onologolela egumi yaaye wa egumi yoohumala. 26 Ole onagiimelela enofuneya oliye agiharege; wewo onaakaliimi, mwiimeleli aaga funaakaligiye. Ole onagiimelela, Ababa enoodha emuriihe”.

Yesu onowoga dha okwa waaye

27 Yesu ahiwelelaga owoga, wiira: “Murima waaga onowukuuwa. Ki giwoge ddi? Sowi giire: ‘Babani, givulumuseni va mudhidhi ola wa masooso?’ Eehi, vovi gidheele mwaha wa mudhidhi olena. 28 Babani, thithimihani ndina neenyu”. Vevale wahiiweyaga ndhu nakumelege odhulu, neeraga: “Gahithithimiha ndina naaga, vano ginowelela othithimiha ndina naaga”.

29 Anamwinji yaaligi vevale veewiligiisu madhu ayo, yahiiiraga: “Dari sirumile”. Amohi yeeraga: “Ole awogiiyena aali mungero”. 30 Yesu ahawaaddelaga, wiira: “Ndhu ndi nidheele wi nuukamihedheni, kahuwo wi nigikamihedhe miyo. 31 Dhiinova ohufiya mudhidhi wi athu a ela-

^x 12.15 *Ziyoni* naali ndina nimohi na Zheruzalemi. ^y 12.15 Zakariya 9,9

bo ya vati ethongiwe. Dhiinova ole onalamula elabo ya vati oneere wiigariwa. ³²Vano gadha gitomeyiwa,^z ginoodha gaadhena athu aate-ne wa miyo”. ³³(Yesu ahiwogaga madhu alena wi awaaddele mukalelo wookwa weeriye akwe.) ³⁴Anamwinji yahaakulaga, wiira: “Hiyo nihiiwa mMalumuloni wi Kirixtu onaakale a okala ni okala, ki we onawoga addi, wiiraga: ‘Soofuneya wi Mwaana a Muthu atomeyiwe?’ Mwaana a Muthu oyo baani?” ³⁵Yesu ahawaaddelaga, wiira: “Waraa oli vaari veenyu onaakale wa mudhidhi vang'ono baahi. Mweeddege vevo viniinyuna waarawo wi yihi ehuuhuruwedheni. Vowi oneedda muyiihini kanoonawo onadhowiye. ³⁶Mudhidhi ola wara viliwa vaari veenyu, muroromele waarawo wi mukale athu oweedda mowaara”.

Yesu agawogile dhedhi, ahivenyagavo, odhowa wiipita.

AZhudewu kayamuroromele Yesu

³⁷Naari Yesu eerilenaave dhitoonyihedho dhaatedhene nde, kayamuroromele, ³⁸wi dhaakwanele dhawogile namavuhulela Ezaya, eera:

“Nabwiya, ororomele olaleya weehu baani?”

Woonihiwe owodha wa Nabwiya baani?”^a

³⁹Mowindo aliwa kayaroromele, vowi Ezaya teto ahiwoga, wiira:

⁴⁰“Mulugu ahaathimiha meento eewa wi ehoonege; waavaaddiha mirima dheewa wi ehiiwelelegemo; ndo kayaandile otthwaruwa, ewelela wa miyo wi gaayilihe”.^b

⁴¹(Ezaya awogele ndo dha Yesu mwaha wi ahoona nthithimiho naaye).

⁴²Naari ndo, apogo ajinji yahimuroromela Yesu. Mbwenye mwaha wa aFarizi, kayeesoriha voweela. Vowi yowoova wiigariwa mu nyuba ya matugumano. ⁴³Aliwa yadhiveliwa oriihiwa ni athu ohiya oriihiwa ni Mulugu.

Madhu a Yesu enoodha yaathonge athu

⁴⁴Yesu ahiwogaga moogweliha madhu, wiira: “Ole onagiroromela kanagiroromela miyove baahi, mbwenye onamuroromela teto ole ogirumile.

⁴⁵Vano ole onagoona, onamoona teto ole ogirumile. ⁴⁶Gidhiile mwiilaboni mu wona wara wi ole onagiroromela ahikaleve muyiihini. ⁴⁷Ole oneewa madhu aaga, ahaalogoleta, miyo kaginamuthonga. Vowi kagidhee wi gaathonge athu, mbwenye gidhee wi gaavulumuse. ⁴⁸Ole onagikoodda, ahaakela madhu aaga, ohukalawo onaadhe amuthonge. Madhu ginaawoge-siimi binaadhe emuthonge va nlabo noomariha. ⁴⁹Kagawoga dhookumela wa miyo meenka, Baabi ogirumile digilamule wi giwoge ni osuziha

^z 12.32 *Ovenyihiwa vati enatapulela okomeliwa vamuraddini, ovenyihiwa muukwani ni ogwela odhulu.* ^a 12.38 Ezaya 53.1 ^b 12.40 Ezaya 6.10

dhaatedhene dhedhi. ⁵⁰Miyo gihinona wi nlamulo neewa nnovaha egumi yoohumala. Dhinawogiimi, ginawoga mooligana mugaaddelele Baabi”.

Yesu onowaahuwa manyalo a anamasuuzaa aaye

13 ¹Othabela wa Paxkwa^c ogali vakukuuve, Yesu aganonile wi mudhidhi waaye wahifiya woovenyamo mwiilaboni mu, adhowe wa Baabi vowi ahaadhivela ale yaali aaye mwiilaboni mu, owaadhivela ofiyedha omakuthulo.

²Yesu ni anamasuuzaa aaye yajaga yooja ya ciguwo. Ddiyabo^d agamalile ohela moobuwelelo abure mmurimani mwa Zhudasi mwaana a Simawu a oEsikariyothi wi dampeleke Yesu. ³Yesu ahinonaga wi Baabi ahimpelekela dhego dhaatedhene mmadani mwaaye. Teto oliye ahinonaga wi akumele wa Mulugu, vano onowelega wa Mulugu. ⁴Nuwindo, Yesu ahivenyaga vajigiisu, okurula yoowara yaaye, othukula yowiifufuthana, wiimagana mmwiinuni. ⁵Ageere ndo, ahihelaga mahinje mbaasiyani, wambeela waahuwa manyalo a anamasuuzaa aaye, waafufuthaga ni yowiifufuthana ele yamageligiye mmwiinuni.

⁶Yesu agafiyile vaaligi Simawu Peduru, Peduru ahiiraga: “Nabwiya, nyoovo mugihuwe manyalo aaga?” ⁷Yesu ahimwaakulaga, wiira: “Dhiinova kunonile dhineeriimi, mbwenye osogolo oneere ononelamo”. ⁸Peduru ahiiraga: “Kamudha mwaahuwa manyalo aaga”. Yesu ahimwaakulaga, wiira: “Gahuuhuwa, kunakala aaga”. ⁹Vano Simawu Peduru ahaakulaga, wiira: “Nabwiya, dhakala ndo, kamwaahuwe manyalove teto mwaahuwe madada aaga ni muruya”. ¹⁰Yesu ahimwaakulaga, wiira: “Ole ohabile enafuneya ahuwe manyalove baahi. Vowi mwiili waaye bwapameene. Nyo muli apameene, mbwenye kahuwo mwaatene”. ¹¹Yesu ahimunonaga ole ampeleke, bumwahaya wawogeliye, eera: “Kahuwo wi mwaatene muli apameene”.

¹²Yesu agaahuwile manyalo a anamasuuzaa aaye, ahiwelelega owara odhowa vamajelo vale. Vooharela ahaakohaga, wiira: “Nyo muhunone-lamo dhuwiireliimini? ¹³Nyo munagiira ‘Namasuuziha’ ni ‘Nabwiya’. Vano munowoga pama, vowi miyo gili. ¹⁴Akala miyo, Nabwiya ni Namasuuziha eenyu, guhuuhuwani manyalo, enofuneya teto muhuwanenge manyalo mmohi ni mukwaaye. ¹⁵Guhuvahani nifwanafwaniho wi teto mwiiregena wona miyo guwiireliimini. ¹⁶Ebaribareene, ebaribareene ginowuwaaddelani wi mudhaari kanamukwaranya nabwiya aaye, naari oorumiwa kanamukwaranya omurumile. ¹⁷Mweera munonelamo dhego dhedhi, munakala oorelihiwa mweeragana”.

^c 13.1 *Othabela wa Paxkwa* yaali mathanga oofuneyesesa a Zhudewu. Moone Okuma 12.1-27. Vowi Yesu avenyihiwe nlabo nenddo na Paxkwa, hiyo dhiinova Paxkwa eehu nna-thabela ovenyihiwa muukwani wa Yesu. ^d 13.2 *Ddiyabo* naali ndina nimohi na Sathana.

Yesu onovuwiha wi oneere opelekiwa

(*Matewuzhi 26.17-30; Maruku 14.12-26; Luka 22.7-23*)

¹⁸Yesu ahiwelelaga owoga, wiira: “Dhego nda kaginoowogelani mwaatene. Gihaanona ale gaasakuliimi. Mbwenye wi dhaakwanelihiwe Maleba Ootaleleya dhinawogiiwa: ‘*Olene aja vamohi ni miyo ohugiinyu-wela*’.^e ¹⁹GINOWUWAADDELANI dhedhi dhihinapadduwe wi dhapadduwa muroromele wi Miyo Gili.^f ²⁰Ebaribareene, ebaribareene ginowu-waaddelelani wi onamwaakela ole onamurumiimi, onagaakela miyo. Teto onagaakela miyo, onamwaakela ole ogirumile”.

Yesu onomuthoma onampeleke

(*Matewuzhi 26.20-25; Maruku 14.17-21; Luka 22.21-23*)

²¹Yesu agawogile dhedhi, murima waaye wahukuuwaga, owoga mo-wiiweya, wiira: “Ebaribareene, ebaribareene ginowuwaaddelelani wi mmohi mwa nyo onogipeleka”. ²²Anamasuuzwa ale yowiiing’ananaga ehi-nonile wi amwaagaga aani. ²³Namasuuzwa mmohi, ole Yesu amudhiveliye vajinji, aaligi vakukuuve ni Yesu. ²⁴Vano Simawu Peduru ahimutoonyaga namasuuzwa ole wi amukohe Yesu onamwaagiiyena. ²⁵Vevale nama-suuzwa ole ahisameelaga omurimani wa Yesu, omukoha, wiira: “Nabwiya, munamwaaga aani?” ²⁶Yesu ahaakulaga, wiira: “Ole onamvahiimi epaddi ya mukaathe ele enaarehiimi mmuziwoni, di oyene”. Vano agarehile mukaathe ole, ahimvahaga Zhudasi mwaana a Simawu a oEsikariyothi.

²⁷Zhudasi ahijaga mukaathe ole. Vano Sathana ahivolowaga mwa oliye. Yesu ahimwiirelaga: “Eneeriwena, wiirena mowaaguva”. ²⁸Vaari wa alene yaaligi vamajelo vale, kalivo anonelegemo dhedho dhamwaaddele-giye. ²⁹Voonona wi Zhudasi dalogolela nthumba na korowa, akwaaye yoobuwelaga wi Yesu afunaga Zhudasi adhowe agule dhoofuneya dha vamathangani, naari onadhowa apeleke yego wa oorabula. ³⁰Oliye agajile mukaathe ole, ahikumaga mowaaguva. Mudhidhi olene yeeraga ogaribile.

Nlamulo nixa

³¹Zhuda agakumile, Yesu ahiiraga: “Mwaana a Muthu onothithimihi-wa, vano odheela mwa oliye, Mulugu onothithimihiwa. ³²Akala Mulugu onothithimihiwa odheela mwa Mwaana, Mulugu mwa oliyeneene oneere omuthithimihi Mwaana, vano Mulugu oneere omuthithimihi mowaagu-va. ³³Ahima aaga, ginokala ni nyo mudhidhi vang’ono. Munoodha mugisayelege, mbwenye ginowaaddelelani dhiinova wona mwawaaddele-

^e 13.18 Masaalimu 41.9 ^f 13.19 *Miyo Gili* thi ndina Mulugu niivahiliye, nneeweya muHe-beri: YAHWEH. Moone Okuma 3.14.

liimi apogo a aZhudewu, giira: ‘Wewo onadhowiimi, nyo kamunaande ofiyawo’. ³⁴Guhuvahani nlamulo nixa nddi: Mudhivelanege mmohi ni mukwaaye. Wona miyo moodhivelelimini, nyo teto mudhivelanege mmohi ni mukwaaye. ³⁵Mwaadhivelanaga mmohi ni mukwaaye, athu aatene enoodha enone wi ebaribareene muli anamasuuz aaga”.

Yesu onomwaaddela Peduru wi oneere omukoodda
(*Matewuzhi 26.31-35; Maruku 14.27-31; Luka 22.31-34*)

³⁶Simawu Peduru ahimukohaga Yesu, wiira: “Nabwiya, munadhowa wuuvi?” Yesu ahaakulaga, wiira: “Onadhowiimi, dhiinova kunaande ogihara, mbwenye osogolo onoodha ogihare”. ³⁷Peduru ahimukohaga, wiira: “Nabwiya, mwaha bwaddi dhiinova ohunaandeliimi wuuharani? Miyo ginovaha egumi yaaga mwaha wa nyo”. ³⁸Vevale Yesu ahimwaakulaga, wiira: “Onovaha egumi yaawo mwaha wa miyo? Ebaribareene, ginowuwaaddela wi: Mutubi ahinandde ‘Kokoliko’, oneere ogikoodda dila thaaru, wiiraga kuginonile”.

Yesu dili dila yoodhowana wa Baabi

14 ¹Yesu ahawaaddelaga anamasuuz aaye, wiira: “Mirima dheenyu kadhikathamiheye. Mmuroromele Mulugu teto mugiroromele miyo. ²Nyuba ya aBaba muhukala mburo dhijinji. Dhaheere dhihikala ndo kagowaaddelani wi ginadhowa goosanyedheleni mburo. ³Gadhowa goosanyedhelani, ginoowela, gidhe guuthukuleleni wa miyo wi onaakaliimi nyo teto mwakalege wewo. ⁴Wewo onadhowiimi, muhunona dilaya”.

⁵Tome ahiiraga: “Nabwiya, kannonile wewo munadhowiinyu, vano dilaya nnaanone addi?” ⁶Yesu ahimwaakulaga, wiira: “Miyo gili dilaya teto gili ebaribari ni egumi. Kalivo onadhowa wa Baabi ahivirile wa miyo. ⁷Mwahaaginone ebaribareene teto mweere waanona aBaba. Wambeela dhiinova muhaanona aBaba teto muhawoona”.

⁸Filipi ahiiraga: “Nabwiya, nooniheni Baabi oyo, enafuniihu si eyene baahi”. ⁹Yesu ahimwaakulaga, wiira: “Filipi, gihikala ni nyo mudhidhi waatene, kunaginoneve? Ole ogoonile, ohumoona Baabi. Oneerela ddi wi: ‘Noonihe Baabi’? ¹⁰Kunaroromela wi miyo ginakala mwa Baabi teto Baabi onakala mwa miyo? Madhu ginowaaddeliimini kinakumela wa miyo meenka, enakumela mwa Baabi onakala mwa miyo, oliye onahidda mabasa aaye. ¹¹Muroromele wi miyo ginakala mwa Baabi teto Baabi onakala mwa miyo. Mwaanganyedhaga, roromelani mwaha wa mabasa eneereya. ¹²Ebaribareene, ebaribareene ginowuwaaddelani wi oyene onagiroromela, oliye oneerege wiirana dhedhi dhineeriimina. Teto oneere waanda wiirana okwaranya dhedhi mwaha wi miyo ginadhowa wa Baabi. ¹³Dhaatedhene munadhiinyu mulobe mwa ndina

naaga gineerege wiirana wi Baabi athithimihiwe odheela mwa Mwaana. 14Mwagiloba yego mwa ndina naaga, gineerege wiirana”.

Yesu onororomeliha ovaha Muneba Woweela

15“Akala munogidhivela, muneerege wawiiwelela malamulo aaga. 16Vano ginoodha gimulobe Baabi, oliye oovaheni Namaakihedha mmohiwa wi akalege ni nyo okala ni okala. 17Namaakihedha oyo bu Muneba wa ebaribari. Athu a elabo kinaanda omwaakela mwaha wi kinamoonege naari omunona. Nyo muhumunona mwaha wi oliye onakala ni nyo teto onakalave mwa nyo. 18Kaginoohiyeni wona anakwaadhuni. Ginoowelega wa nyo. 19Mwa mudhidhi vang'ono athu a elabo kidha egoona dila biili, mbwenye nyo munoodha mugoone. Miyo gihikalana egumi, mwaha wa ela nyo teto munoodha mukalenaave egumi. 20Nlabo nenddo munoonona wi miyo ginakala mwa aBaba, nyo munakala mwa miyo teto miyo ginakala mwa nyo.

21“Ole winna malamulo aaga, awiiwelelega, dinagidhivela. Ole onagidhivela, aBaba enoodha emudhivele. Miyo teto ginoodha gimudhivele, vano ginoodha giyooneyihe wa oliye”.

22 Zhudasi, (ahili Zhudasi a oEsikariyothi ole,) ahimukohaga, wiira: “Nabwiya, munafunela ddi wi mwiyooneyihe wa hiyo baahi, ohuli wa athu aatene?” 23 Yesu ahaakulaga, wiira: “Ole onagidhivela oneerege wawiiwelela madhu aaga, aBaba enoodha emudhivele; vano hiyo nnoodha wa oliye, nikalege mwa oliye. 24Ole ohunagidhivela kanawiiwelela madhu aaga. Madhu ala munawiiwiinyu kahuwo aaga, mbwenye ba Baabi, oyene ogirumile.

25“Gahuwaaddelani dhaatedhene dhedhi vaaliimi ni nyo. 26Vano Namaakihedha, oli Muneba Woweela, ole Baabi onadhiiye oorumihedheni mu ndina naaga, bunadha wusuuziheni dhaatedhene, wuwuubusedhagani dhaatedhene dhiwogiliimi ni nyo.

27“Ginowuuhiedhani murenddele. Murenddele waaga ginowuuvahani, kaginoovahani wona elabo munavaheliwa. Mirima dheenyu kadhikathamiheye naari woova. 28Mwihiiwa guwaaddeliimini wi: ‘Miyo ginoodhowa, mbwenye ginowelega wa nyo’. Mwahaagidhivelege mweere ohagalala munonaga wi ginadhowa wa Baabi, vovi Baabi ohugikwaranya miyo. 29Ginowuwaaddelani dhihinapadduwe wi dhapadduwa muroromele. 30Dhiinova kaginaawoge dhijinji ni nyo, vovi Sathana, oolamula a elabo ela, onoodha. Mwa miyo oliye kanna mburo, 31miyo gineerana nde Baabi dhigilamuleliye wiirana wi athu aatene enone wi ginomudhivela Baabi. Ndowneni, nivenyevo”.

Yesu dili mvidera wa ebaribari

15 1 Yesu wiire: “Miyo gili mvidera wa ebaribari, aBaba bili namalimaya. 2 Mijindda dhaatedhene dhili mwa miyo dhihinavaha

dhoovaha enokakatha, mijindda dhaatedhene dhinavaha dhoovaha enothungulela wi dhivahege dhoovaha dhijinji. ³Nyo muhuhuwiwa pama mwaha wa madhu guwaaddeliimini. ⁴Kalanive mwa miyo, vano miyo gikalegeve mwa nyo. Mijindda kadhinanda ovaha dhoovaha va weekiwa dhaahikalave vamuthankoniviwa. Mwa mukalelo mmohive nyo mwaahikalave mwa miyo, kamunaande ovaha dhoovaha.

⁵“Miyo gili mvidera, nyo muli mijinddadha. Muthu ole onakalave mwa miyo, miyo mwa oliye, oliye dinavaha dhoovaha dhijinji. Vowi mwamwalana ni miyo kamunaande wiirana yego. ⁶Ole ohunaakaleve mwa miyo onothathileliwa okwibi wona mujindda, wumma. Mijindda nde dhinoddodeliwa, ovokedhiwa vamunddoni, ozha. ⁷Mwakalave mwa miyo, mwiiwelelagave dhosuuziha dhaaga, mwaloba dhinafuniinyu, muneerege ovahiwa. ⁸ABaba enothithimihiwa mwaavahaga dhoovaha dhijinji, moonihaga wi muli anamasuuzi aaga a ebaribari.

⁹“Wona Baabi munagidhiveleliye, mwa mukalelo mmohive, miyo ginowudhivelani. Mukalegeve mwa odhivela waaga. ¹⁰Akala muneedda mmalamuloni mwaaga, munokalave mwa odhivela waaga wona miyo gineedda mmalamuloni a aBaba, ndo ginakalave mwa odhivela weewa.

¹¹“Guhuwaaddelani dhego dhedhi wi ohagalala waaga okale mwa nyo wi ohagalala weenyu okale wowaakwanela. ¹²Nlamulo naaga thi nddi: Mudhivelanege mmohi ni mukwaaye wona miyo muudhiveleliimini. ¹³Odhivela wuulubale fuwula: Oveleela egumi yaawo vamburoni va akwaawo. ¹⁴Nyo muli akwaaga mweeddagave mule munoolamuliimini. ¹⁵Dhiinova kaginowiithanani amwiimeleli, vovi mwiimeleli kananona dhineerana nabwiya aaye. Moohiyaniha, ginowiithanani akwaaga, mwaha wi dhaatedhene dhiiwiliimi wa aBaba guhuwaaddelani. ¹⁶Kahuwo nyo mugisakulile, mbwenye miyo duusakulileni, wuuthomani wi mudhowe, mwavahe dhoovaha, dhoovaha dhiwa dhoologela. Mweeragana ndo dhaatedhene munamulobigiinyu Baabi mwa ndina naaga oneerege wuvahani. ¹⁷Nlamulo naaga thi nddi: Mudhivelanege mmohi ni mukwaaye”.

Nihidda na athu a elabo ya vati wa ooromela

¹⁸“Akala athu a elabo ela ya vati ehuwiiddani, nonani wi vowambeela yagiiddile miyo. ¹⁹Nyo mwahaakale a elabo ela, athu yeerege wuudhivelani wona muli eewa. Mbwenye nyo kamuli a elabo ela, miyo guhuusakulani, wuvenyihamoni; bu mwahaya onowiiddeliisuni. ²⁰Muubuwelege madhu yowaaddeleliimini owi: ‘Mudhaari kanamukwaranya nabwiya aaye’. Akala miyo yahigiharahara teto eneere wuuharaharani. Akala aliwa yahiiwelelele madhu aaga teto eneere wawiiwelelele madhu eenyu. ²¹Dhaatedhene dhedho dhinowiireyeleni mwaha wa miyo, vovi kimunonile ole ogirumile. ²²Gaheere gihidha, gaasuuziha, kayakanna muladdu wa dhoothega dheewa. Dhiinova kinna woothawela wa dhoothega dheewa. ²³Muthu

onagiidda teto onowiiddana ni aBaba. ²⁴Gaheere gihiirana mabasa vaari veewa, athu aatene ehinandiisu wawirana, kayakanna muladdu. Aliwa ehoona, ogiidda miyo ni aBaba. ²⁵Nda dhapadduwele wi dhaakwanelihe dhalebiwe Mmalamuloni eewa, dhowi: ‘Yahigiidda vihili mwaha’.[§]

²⁶“Adha Namaakihedha, ole oneeriimi guurumihedheni okumela wa Baabi, oyene oli Muneba wa ebaribari wookumela wa Baabi, Muneba oyo wadha, oneere wiirela onamoonna dha miyo. ²⁷Nyo teto muneere wiirela onamoonna dha miyo, vowi muhukala ni miyo okuma omambeeelo”.

16 ¹Yesu ahiwogaga, wiira: “Gahuwaaddelani dhedhi wi munaadhe mukwakwathuwe. ²Enoodha yuwiigaregeni mu nyuba dha matugumano. Ebaribari mudhidhi onoodha wi aatene enadhe yuupengegeni enoobuwelege wi enamulaba Mulugu. ³Enoodha yiiregena dhedhi mwaha wi kimunonile Baabi, naari miyo. ⁴Ginowaaddelani nda wi wafiya mudhidhiya muubuwelege wi gahuwaaddelani.

Mabasa a Muneba Woweela

“Vowambeela kagowaaddelani dhedhi mwaha wi gaali vamohi ni nyo. ⁵Mbwenye dhiinova ginodhowa wa ole agirumile. Vano kalivo mwa nyo onagikoha, eera: ‘Munadhowa wuuvi?’ ⁶Mmurimani mweenyu muhudhaala okubanya mwaha wi guhuwaaddelani dhedhi. ⁷Mowindo ginowuwaaddelani ebaribari ela: Sapama wa nyo miyo gidhowe. Vowi gaahidhowa Namaakihedha kanaadhe wa nyo. Vano gadhowa ginowu-rumihedhani. ⁸Oliye adha oneere wawooniha athu dhoothega dheewa, awoonihe wogoowa, teto awoonihe othongi wa Mulugu: ⁹Wa dhoothega mwaha wi kigiroromele; ¹⁰wa wogoowa mwaha wi ginadhowa wa Baabi, vano kamunawelega mugoona; ¹¹wa othongi mwaha wi oolamula a elabo ya vati ohukoniwa wale.

¹²“Gihikanna madhu majinji wi guwaaddelani, mbwenye dhiinova kamunaande ovilelana. ¹³Wafiya Muneba wa ebaribari oneere wusuuzihani ebaribari yaatene. Vowi kudha owogaga dhookumela wa oliye yeeka, mbwenye dhaatedhene dhinewiye, sinadhiiye awogege. Onoodha oolaleyeleni dhinaapadduwe musogolo. ¹⁴Oliye onoodha agithithimihe, vowi onoodha aakele wa miyo, vano alaleyenge wa nyo. ¹⁵Dhaatedhene dhinna Ababa saaga. Bumwahaya giwogeliimi wi Muneba ole onoodha waakele dhookumela wa miyo wi wuulaleyeleni”.

Okubanya weenyu onoodha osadduwe ohagalala

¹⁶“Va mudhidhi vang’ono kamudha mugoona, vano vavira mudhidhi vang’ono, munoodha mugoone”. ¹⁷Anamasuuzi aaye amohi yookohanaga, yiiraga: “Ki elaya enanaaddeliye ddi? Oliye oneera: ‘Va mudhidhi

§ 15.25 Moone Masaalimu 35.19; 69.4

vang'ono kamudha mugoona, vano vavira mudhidhi vang'ono, munoodha mugoone'. Teto onawoga wi: 'Ginadhowa wa Baabi' ". ¹⁸ Yookohanaga, yiiraga: "Mwaha wa ddi enawogeliye, eeraga: 'Va mudhidhi vang'ono'? Kannewelelamo dhinafuniye owoga".

¹⁹ Yesu aganonile wi yoofunaga omukoha mwaha wawogeliye, ahaa-kohaga, wiira: "Munakohana madhu ala ewogiliimi, giira: 'Va mudhidhi vang'ono kamudha mugoona, vano vavira mudhidhi vang'ono, munoodha mugoone'? ²⁰ Ebaribareene, ebaribareene ginowuwaaddelani wi nyoovo munoodha muundde, mukuwaga, mbwenye athu a elabo ya vati ela enoodha ehagalalege. Munookalana okubanya, vano okubanya weenyu onoodha osadduwe ohagalala. ²¹ Mwihiyana wafiya mudhidhi waaye wa obala, onokubanya mwaha wi mudhidhi waaye wa goyi ohufiya. Mbwenye mwaana abaliwa, mwihiyana ole kanoobuwelela goyi yaaye, vovi ohuhagalala voombala muthu mwiilaboni mu. ²² Mwa mukalelo mmohive dhiinova muli ookubanya, vano ginoodha guwooneni dila ya nabili, vevo mirima dheenyu dhinoodha dhihagalale. Kalivo onowaakeni ohagalala weenyu. ²³ Va nlabo nenddo kamudha mugiloba yego. Ebaribareene, ebaribareene ginowuwaaddelani wi dhaatedhene munamulobigiinyu Baabi mwa ndina naaga oneerege wuuvahani. ²⁴ Dhiinova kamunalobe yego mu ndina naaga. Lobani, munoodha mwaakele wi ohagalala weenyu okale wowaakwanela".

Yesu ohugonjiha elabo ya vati

²⁵ Yesu wiire: "Miyo guwaaddeleni dhaatedhene mwa misibe. Mudhidhi onoodha vineeriimi gihiwogege ni nyo mwa misibe, mbwenye giwogege mowiiweya dha Baabi. ²⁶ Nlabo nenddo munoodha mulobege mwa ndina naaga, kadhinaafuneyege wi guulobelegeni wa Baabi, ²⁷ vovi Baabi mwinyeene onowuudhivelani. Onowuudhivelani mwaha wi munogidhivela teto mwaha woororomela wi ginakumela wa Mulugu. ²⁸ Miyo gidhiile wa Baabi elabo ela ya vati. Dhiinova ginohiya, ginawelela wa Baabi".

²⁹ Anamasuuzaa aaye yahiiraga: "Eyaa! Dhiinova munowoga mowiiweya, ehili mwa madhu oorusa wawiiwelelamo. ³⁰ Vano nihinona wi muhunona dhaatedhene, kavili mwaha wi muthu ookohegeni. Mwa ela nnororomela wi mukumile wa Mulugu". ³¹ Yesu ahawaakulaga, wiira: "Dhiinova muhuroromela? ³² Mvuruwane, onoodha mudhidhi, vano ebaribari mudhidhiya ohufiya, aatene vinadhiinyu mbalalesiwe, kadda muthu adhowege owaniwa, mugihiye meenka. Mbwenye kagili meenka, Baabi oli ni miyo. ³³ Dhego dhedhi ginowuwaaddelani wi mukanne murenddele mwa miyo. Elabo ela ya vati muneere okanna makathamihho, mbwenye mmage mirima, vovi miyo gihigonjiha elabo ela ya vati".

Yesu onowiilobelela

17 ¹ Yesu agawogile dhedhi, ahaang'anaga odhulu, wiira: "Babani, mudhidhi ohufiya. Muthithimiheni Mwaaninyu wi Mwaaninyu

oothithimiheni. ²Vowi muhumvaha owodha wowaalamula athu aatene, owodha wi aavahe egumi yoohumala athu aatene mumvahiliinyu. ³Egumi yoohumala siila: Yuunoneni nyo, Mulugu a ebaribari teto emunone Yesu Kirixtu, oyene mwamurumiliinyu mwiilaboni ya vati. ⁴Gaakwanihiliimi mabasa mwagivahiliinyu vati vano, guhuuthithimihani. ⁵Dhiinova, Babani, mugithithimihe vameentoni veenyu ni nthithimiho nanniimina wa nyo, ehinapaddusiwe elabo ya vati”.

Yesu onowaalobelela anamasuuzaa aaye

⁶“Gihawooniha ndina neenyu ayene egivahiliinyu vati vano. Yaali eenyu, muhugipelekela, vano enowiiwelela madhu eenyu. ⁷Dhiinova ehinona wi dhaatedhene mwagivahiliinyu sookumela wa nyo. ⁸Gihaavaha masuuziho mwagivahiliinyu, ehaarumeedha. Ehinona ebaribareene wi gikumele wa nyo teto enoromela wi di nyo mugirumile.

⁹“Miyo ginowaalobelela. Kaginaalobelela athu a elabo ela ya vati, mbwenye ginaalobelela ale yagivahiliinyu, vowi beenyu. ¹⁰Dhaatedhene dhili dhaaga seenyu; dhaatedhene dhili dheenyu saaga, vano ginouthithimihiwa odheela wa aliwa. ¹¹Miyo kagili vati vano, mbwenye aliwa enakala vati vano. Ginoodha wa nyo. Babani oweela, akameeleni odheela owodha wa ndina neenyu mwagivahiliinyu wi ekale amohive wona hiyo nili mmohive. ¹²Vaaliimi vamohi ni aliwa, gowaakameela ni owodha wa ndina neenyu, mwagivahiliinyu. Gahawiing'anela pama, kalivo arimeele, omwihiya oobwanyuwa ole, ndi dhapadduwele wi dhaakwanelihe dhedho Maleba Ootaleleya dhawogiliwa.

¹³“Dhiinova ginadha wa nyo. Ginawoga dhedhi viliimi vati vano wi ekalena ohagalala wowaakwanela winniimina. ¹⁴Gihaasuziha madhu eenyu, vano athu a elabo ela ya vati enowawiidda mwaha wi aliwa kahuwo a elabo ela, wona miyo teto kagili a elabo ela ya vati. ¹⁵Kaginaloba wi mwaavenyihevo vati vano, mbwenye wi mwawiing'anele wa Nambure.^h ¹⁶Aliwa kahuwo a elabo ela ya vati wona miyo teto kagili a elabo ela ya vati. ¹⁷Mwa ebaribari mwiirihe wi aliwa ekale athu eenyu epelekiwe; vowi madhu eenyu si ebaribari. ¹⁸Muhugiruma vati vano, mwa mukalelo mmohive gihaaruma mwiilaboni ela ya vati. ¹⁹Mwaha wa aliwa ginowiipeleka wa nyo wi aliwa teto epelekiwe wa nyo mwa ebaribari”.

Yesu onowaalobelela aatene enaadhe emuroromele

²⁰“Kaginaalobelela aliwave weekiwa teto ginowaalobelela ale enaadhe egiromomele mwaha wa madhu a akwaaga ala; ²¹wi aatene ekale amohive. Babani, ginowaalobelela wi ekale mwa hiyo wona nyo munakala

^h 17.15 *Nambure* Naari wi: *Sathana*, musogoleli mulubale a mineba dhootakala.

mwa miyo teto wona miyo ginakala mwa nyo. Mowindo athu enoodha eroromele wi di nyo mugirumile. ²²Nthithimiho nenddo mwagivahiliinyu gihaavaha aliwa wi ekale amohive wona hiyo nili mmohive; ²³miyo gikale mwa aliwa, nyo mukale mwa miyo wi ekale amohive mowaakwana. Mowindo athu aatene enonona wi di nyo mugirumile teto enonona wi munowaadhivela wona munagidhiveleliinyu.

²⁴“Babani, ginafuna wi ayene mugivahiliinyu ekale vamohi ni miyo vevo vinaakaligiimi. Ginafuna wi yoone nthithimiho naaga, ndde nagivahiliinyu mwaha wi mwahigidhivela ehinapaddusiwe elabo ela ya vati. ²⁵Babani owogoowa, athu a vati vano kayuunonileni, mbwenye miyo guhuunonani teto ala mugivahiliinyu ehinona wi di nyo mugirumile. ²⁶Gihaanoniha ndina neenyu teto gineerege waasuuziha wi odhivela weenyu munagidhiveleliinyuna okalegeve mwa aliwa teto miyo ginaakalegeve mwa aliwa”.

Omagiwa wa Yesu

(*Matewuzhi 26.47-56; Maruku 14.43-50; Luka 22.47-53*)

18 ¹Yesu agamalile olobela, ahivenyaga ni anamasuuzi aaye yahidhowaga kobela ya mukolopa Kederoni.ⁱ Wewo wahikala mudda wa olivera, ahivolowaga mwemo ni anamasuuzi aaye. ²Zhudasi oyene aampeleke Yesu, ahinona mburo oyo, vowi Yesu oodhowesa wewo ni anamasuuzi aaye. ³Zhudasi ahithukulaga nikuru na anyakoddo a oRoma, vamohi ni anamaang'anela yarumiwege ni apogo a anamakutha ni aFarizi. Aliwa yahifiyaga mmuddani mule egathukule mitigo dhuulubale, mwenje ni yeela dha koddo. ⁴Yesu ahinonaga dhaatedhene dhaamwiireyele. Mwaha wa ela ahawaaddamelaga waakoha, wiira: “Munamusayela aani?” ⁵Yahimwaakulaga, wiira: “Yesu a oNazarethi”. Yesu ahiiraga: “Miyo Gili”.^j (Vano Zhudasi, muliba ompeleka Yesu, aaligi ni aliwa.) ⁶Yesu ageerile: “Miyo Gili”, aliwa yahivelelaga mundduli, otongwela vati. ⁷Vano Yesu ahaakohaga dila biili, wiira: “Munamusayela aani?” Aliwa yahiraaga: “Yesu a oNazarethi”. ⁸Oliye wiira: “Gihimala wuwaaddelani wi miyo gili oliye. Vano akala munagisayela miyo, ahiyeni alobwana ala edhowege”. ⁹(Yesu awogelege ndo wi dhaakwanele oliye dha-wogiliye mundduli wi: “Kagimurimeelihevo naari mmohi mwa ale mwagivahiliinyu”).

¹⁰Vano Simawu Peduru ahixomolaga supaadda nannigiiyena, omporosana mwiimeleli a musogoleli a anamakutha, ompadha nibaru na

ⁱ **18.1** *Mukolopa Kederoni* waali mukolopa oyene wavira vaari va Zheruzalemi ni Mwaango wa Olivera. Wakalana mahinje mudhidhi wa muzongwe baahi. ^j **18.5-6** *Miyo Gili* thi ndina Mulugu niivahiliye, nneeweya muHeberi: YAHWEH. Moone Okuma 3.14.

omoononi wooja. (Ndina na mwiimeleli oyo eeriwa Maliku.) ¹¹ Yesu ahimwiirelaga Peduru: “Welihedha supaadda naawo muncethani! Kaginaamung'we nakoma^k a goyi ogivahile Baabi?”

Yesu onodhowiwana wa Annasi

(*Matewuzhi 26.57-58; Maruku 14.53-54; Luka 22.54*)

¹² Vevale nikuru na anyakoddo a oRoma ale, vamohi ni musogoleli eewa teto ni anamaang'anela a aZhudewu, yahimwihiddaga Yesu, ommaga. ¹³ Vowambeela yamudhowilegena wa Annasi, aali mooyaaye Kayifa, musogoleli a anamakutha a yaaka elene. ¹⁴ (Kayifa duuleene awaaddelege aZhudewu wi yaali pama muthu mmohi aakwele athu aatene.)

Peduru onomukoodda Yesu

(*Matewuzhi 26.69-70; Maruku 14.66-68; Luka 22.55-57*)

¹⁵ Simawu Peduru vamohi ni namasuuzwa mmohiwa yahimuharaga Yesu. Namasuuzwa mmohiwa oyo ahinoniwa ni musogoleli a anamakutha. Mwaha wa ela namasuuzwa oyo ahivolowaga vamohi ni Yesu vathaddo va musogoleli a anamakutha. ¹⁶ Mbwenye Peduru ahiimelaga vamulago ode. Mowindo namasuuzwa mmohiwa anoniwe ni musogoleli a anamakutha, ahikumaga, owoga ni namaang'anela a vamulago, omvolosiha Peduru. ¹⁷ Namaang'anela a namwali ole ahimukohaga Peduru, wiira: “We kuli mmohi a anamasuuzwa a mulobwana ola?” Peduru ahaakulaga, wiira: “Eehi, kagili”. ¹⁸ Amwiimeleli vamohi ni a anamaang'anela ale yahitubaanyaga munddo mwaha wi wooddiddilaga, yahiiimelaga, woothaga. Peduru aaligi vevale owiimeleene woothaga vamohi ni aliwa.

Musogoleli a anamakutha ahimukohaga Yesu

(*Matewuzhi 26.59-66; Maruku 14.55-64; Luka 22.66-71*)

¹⁹ Vano musogoleli a anamakutha^l ahimukohaga Yesu dha anamasuuzwa aaye ni dhosuuziha dhaaye. ²⁰ Yesu ahimwaakulaga wiira: “Miyo gawogesa mowiiweya vameentoni va athu aatene. Goosuuzihesa mu nyuba dha matugumano teto mu nyuba ya Mulugu, mwemo mwatugumana aZhudewu aatene. Kagiwogile yego mowiipiteya. ²¹ Ki vano, munagikohela ddi? Akoheni ayene yiiwile dhawaaddeliimi. Aliwa ehinona pamadhene dhawogiimi”. ²² Agawogile dhedhi, mmohi mwa anamaang'anela aaligi vevale ahimuddwadhaga Yesu wiintoni, wiira: “Onamwaakula ndo musogoleli a anamakutha?” ²³ Yesu ahimwaakulaga, wiira: “Akala giwogile

^k **18.11** Naari wi: *kopo*. *Nakoma* etoonyihedho ya owali wa Mulugu. Moone Ezaya 51.17,19,22; Zheremiya 49.12. ^l **18.19** *Musogoleli a anamakutha* onaagiwana va di Annasi, oyene aali musogoleli a anamakutha mundduli mwa Kayifa.

mootakaliha, wiirele onamoona wa yootakala eyo. Mbwenye akala gi-wogile mwa ebaribari, onagiddwadhela ddi?”

²⁴Vevale Annasi ahimurumihaga Yesu oomagiweene, wa Kayifa, musogoleli a anamakutha.

Peduru onowelega omukoodda Yesu

(Matewuzhi 26.71-75; Maruku 14.69-72; Luka 22.58-62)

²⁵Simawu Peduru agali owiimeleene oothaga wewule. Yahimukohaga, wiira: “We teto kuli mmohi mwa anamasuza aaye?” Peduru ahikooddaga, wiira: “Eehi, kagili”. ²⁶Mwiimeleli mmohi a musogoleli a anamakutha, mmudhi a ole Peduru amugwaddiligiiye nibaru, ahimukohaga, wiira: “We kaguwoonile ni oliye mmuddani mule?” ²⁷Peduru ahiwelelega okoodda dila ya neethaaru, mowaaguva mutubi ahunddaga.

Yesu vameentoni va kuminadori Pilatu

(Matewuzhi 27.1-2,11-26; Maruku 15.1-15; Luka 23.1-5)

²⁸Bebeheene yahimuthukulaga Yesu, okumela wa Kayifa, omudhowana vaade va kuminadori. Apogo a aZhudewu kayavolowilegewo mwaha wi kayafunaga wiitakaliha, vovi yoofunaga oja Mathanga a Paxkwa.^m

²⁹Mowindo Pilatu ahikumelaga ode, waakoha, wiira: “Mulobwana ola mumfwanyilena yootakala ddi?” ³⁰Yahimwaakulaga, wiira: “Aheere ahiiragana yootakala, kanamudhana wa nyo”. ³¹Vevale Pilatu ahawaa-ddelaga, wiira: “Muthukuleni, mwamuthonge vohariha malamulo eenyu”. Mbwenye aZhudewu yahiiiraga: “Kannarumeedhihiwa ompa muthu”. ³²(Dhapadduwile ndo wi dhaakwanele dhedho Yesu dhawogiliiye dha mukalelo wa okwa waaye wa vamuraadini.)ⁿ

³³Pilatu ahiwelelega ovolowa, omwiithana Yesu, omukoha, wiira: “We oli mwene a aZhudewu?” ³⁴Yesu ahaakulaga, wiira: “Yookoha ela seenyu, naari ehikalavo yuwaaddeleni dha miyo?” ³⁵Pilatu ahaakulaga, wiira: “Miyo gili muZhudewu? Athu a mulogo waawo ni apogo a anamakutha buupelekile wa miyo. Wiirile ddi?” ³⁶Yesu ahaakulaga, wiira: “Omwene waaga kahuwo wa elabo ela ya vati. Omwene waaga wahaakale wa vati vano, amwiimeleli aaga yeere owana koddo wi gihipelekiwe wa apogo a aZhudewu. Mbwenye Omwene waaga kahuwo wa vati vano”. ³⁷Pilatu ahiiraga: “We oli mwene?” Yesu ahaakulaga, wiira: “Nyo dinawoga wi gili mwene. Miyo gihibaliwa, gihidha vati vano wi giirele onamoona ebaribari. Aatene eli a ebaribari eno-wiwa ndhu naaga”. ³⁸Pilatu ahimukohaga, wiira: “Ebaribari si ddi?”

^m **18.28** Paxkwa yaali mathanga oofuneyesesa a aZhudewu. Moone Okuma 12.1-27. Vovi Yesu avenyihwi nlabo nenddo na Paxkwa, hiyo dhiinova Paxkwa eehu nnathabela ovenyihwi muukwani wa Yesu. ⁿ **18.32** ARoma yaakomelesa ale yakoneliwa opwiwa; aZhudewu yaapesa mowaavonya ni mabwe.

Agawogile madhu alene, ahiwelelaga waaligi aZhudewu, wawaaddela, wiira: “Miyo kagimfwanyilena mwaha woomukonana. ³⁹Vano voohariha elemelelo yeenyu, mudhidhi wa omuthabela Paxkwa ginowuutapulelesani munyakaambura mmohi. Ki munafuna ddi gutapuleleni, ‘Mwene a aZhudewu?’” ⁴⁰Vevale aliwa yahikuwaga, wiira: “Eehi, oyo eehi! Nnafuna mmutapule Baraba”. (Baraba oyo aali nipanga.)

19 ¹Vevale Pilatu ahaalamulaga, wiira: “Emuthukule, emuwaxule”. ²Vano anyakoddo yahiluwaga kara^o ya miinga, omuwariha mmuruni mwaaye. Yahimuwarihaga yoowara ya roxa ombeddaga. ³Anyakoddo yoomwaaddamelaga, yiiraga: “Nnowuulojelani nyo, Mwene a aZhudewu!” Teto yoomuddwadhaga wiintoni.

⁴Pilatu ahiwelelaga okuma, wawaaddela aZhudewu, wiira: “Mvuruwane, ginowuudhelanaani Yesu munone wi kaginamfwanyana mwaha oli waatene woomukonana”. ⁵Yesu ahikumaga agawarile kara ya miinga ni yoowara yaroza. Pilatu ahiiraga: “Mmwiing'ane! Mulobwana ola oli va”. ⁶Apogo a anamakutha ni anamaang'anela eewa egamoonile Yesu, yahikuwaga, wiira: “Mmukomele! Mmukomele vamuraddini!” Pilatu ahawaakulaga, wiira: “Nyooovo mmuthukule, mwamukomele; miyovano kagimfwanyilena mwaha”. ⁷AZhudewu yahiraga: “Nihikanna nlamulo, voohariha nlamulo nddo efwaneelele akwe, mwaha wowiyiira Mwaana a Mulugu”.

⁸Pilatu veewiligiye madhu ale, woova waaye wahrenjedhedheyaga. ⁹Vano ahivolowaga, owelela omukoha Yesu, wiira: “Owaninyu fuuvi?” Yesu kamwaakulilege. ¹⁰Vevale Pilatu ahimukohaga, wiira: “Kunagaakula? Kunonile wi gihikanna owodha wowuutapula, naari wowuukomela?” ¹¹Yesu ahiiraga: “Kawakanna owodha oli waatwene wa miyo waheere ohuvahiwa ni Mulugu. Ole ogipelekile dinna yoothega mookwaranya”.

¹²Wambeela vevale, Pilatu oosayelaga dha omutapula Yesu. Mbwenye aZhudewu yahikuwaga, wiira: “Mwamutapula olena kamuli mukwaaye a Sezari. Muthu onadhiira mwene, domwiinyuwela Sezari”. ¹³Pilatu ageewile dhedho, ahimukumihaga Yesu, okaraati veettenguni voothonga miladdu, vamburoni vineethaniwa “Nthaddo noomareliwa ni mabwe”. (Mu eZhudewu eneeriwa “*Gabata*”.) ¹⁴Naaligi nlabo noosasanyedhela na omuthabela Paxkwa,^p mudhidhi ogali vakukuve wora ya neekumi nabiili ya mutana. Pilatu ahawaaddelaga aZhudewu, wiira: “Mwene eenyu ola-to”. ¹⁵Aliwa yahikuwaga, wiira: “Mvenyihevoni! Mvenyihevoni! Mwamukomele vamuraddini!” Pilatu ahaakohaga, wiira: “Gimukomele mwene eenyu?”

^o 19.2 Kara ni yoowara ya roxa dhaali dhitoonyihedho dhooniha othongi wa aRoma, ni aZhudewu. ^p 19.14 Paxkwa yaali mathanga oofuneyesesa a aZhudewu. Moone Okuma 12.1-27. Vowi Yesu avenyihwe nlabo nenddo na Paxkwa, hiyo dhiinova Paxkwa eehu nna-thabela ovenyihwa muukwani wa Yesu.

Apogo a anamakutha yahaakulaga, wiira: “Kaninna mwene mmohi, ahili Sezari”.¹⁶ Vevale Pilatu ahimpelekaga Yesu wi yamukomele vamuraadini.

Okomeliwa wa Yesu vamuraadini

(*Matewuzhi 27.32-44; Maruku 15.21-32; Luka 23.26-43*)

Aliwa yahimuthukulaga Yesu.¹⁷ Oliye agakapathile muraddi waaye, ahikumagana muluwani odhowa omburoni oneethaniwa “mburo wa Egarigadhi”. (Mu eZhudewu oneeriwa: “*Gologotha*”).¹⁸ Wewo yahimukomelaga vamuraadini. Yahaakomelaga teto athu amohi abili, mmohi omoononi wooja, mmohiwa woong'oto, Yesu okala vaari.¹⁹ Pilatu ahilebaga yoonihelo, ohela vamuraadinivo. Ahilebagavo, wiira: “YESU A ONAZARETHI, MWENE A AZHUDEWU”.²⁰ AZhudewu ajinji yaheele-ngaga yoonihelo ele mwaha wi vamburoni vevo Yesu vamukomeliisu vaali vakukuuve ni nluwa na oZheruzalemi; teto mwaha wi yoonihelo ele yalebiwe mu eZhudewu, mu eRoma teto mu eGerego.²¹ Apogo a anamakutha yahimwaaddelaga Pilatu, wiira: “Kamulebe wi: ‘Mwene a aZhudewu’, eehi, mbwenye mulebe wi: ‘Ola wiire: Gili Mwene a aZhudewu’”.²² Pilatu ahiiraga: “Dhedho dhilebiliimi, gihileba”.

²³ Anyakoddo egamukomele Yesu, yahithukulaga dhoowara dhaaye, ogawanya dhipaddi nnayi, munyakoddo oli aatene epaddi yaaye. Yahithukulaga teto mukanja waaye, waali wooluwiwa wambeela vadhulu ofiya omanyaloni, woohukanna musono.²⁴ Vano anyakoddo ale wiiwananela, wiira: “Kanitalanye, moohiyaniha, noombezele gari wi noone onaakale wawani”. Ndo dheereyele wi dhaakwanelihe dhedho Maleba Ootaleleya dhawogiliwa, yiira:

*“Yahigawana dhoowara dhaaga,
teto mukanja waaga yahoombazelaga gari”.*^q

Dhedhi seerile anyakoddo ale.

²⁵ Kukuru ya muraddi wa Yesu yahimelaga amaaye, ddibila a amaaye, Mariya mwadha a Kolopa ni Mariya oMagadala.²⁶ Vevale Yesu agawoonile amaaye ni namasuza amudhiveliye vajinji, ageemelile vakukuuve, ahawaaddelaga amaaye, wiira: “Mmani, mulobwana oyo di mwaana aawo”.²⁷ Vooharela ahimwaaddelaga namasuza ole, wiira: “Ola di mma aawo”. Vano wambeela vevale namasuza ole ahimuthukulelaga vaade vaaye mma ole, omukameelaga.

Okwa wa Yesu

(*Matewuzhi 27.45-56; Maruku 15.33-41; Luka 23.44-49*)

²⁸ Dhigavirile nda Yesu ahinonaga wi dhaatedhene dhihiireya. Vano wi dhaakwanele Maleba Ootaleleya dhawogiliwa, oliye ahiiraga:

q 19.24 Masaalimu 22.18

“Gihikanna nthona”.^r ²⁹Vevale vahikalaga muno wodhaala ni vinyu oonyuunya. Anyakoddo ale yahibwinihaga nthoje mvinyuni mule, oseredha ommirini wa hisope, ofiyiha omulomoni waaye. ³⁰Yesu agamulawihile vinyu oonyuunya ole, ahiiraga: “Dhaatedhene dhihaa-kwanelihiwa”. Vooharelaviwa ahiworomihaga muru, opeleka egumi yaaye.

³¹Naaligi nlabo noosasanyedhela omuthabela Paxkwa. Apogo a aZhudewu kayafunilege wi miruthu nde dhikale vamuraddini^s nlabo na sabuddu, mwaha wi sabuddu ole aaligi oothabela. Mowindo yahimuloba-ga Pilatu wi alamule yaakothole meddo.^t ³²Vano anyakoddo yahidhaaga waakothola meddo wa mmohi mwa abiili ale yakomeliwege vamohi ni Yesu. Teto yahimwiiragana ndo mukwaaye ole. ³³Vafiyiligiwa wa Yesu, egamoonile wi ohukwa, kayakotholege meddo dhaaye. ³⁴Mmohi mwa anyakoddo ale ahimulataga mbararuni mwaaye ni mwaalago, mowaaguva okumamo mwazi ni mahinje. ³⁵Ole oonilege dhedhi onowiirela onamoona, onamoona waaye bwa ebaribari. Oliye ohunona wi dhinawogiiye seebaribari, ohiirela onamoona wi nyo teto muroromele. ³⁶Dhapadduwele ndo wi dhaakwanelihe dhedho Maleba Ootaleleya dhawogiliwa wi: “*Kidha epwesa nikuva naaye*”.^u ³⁷Maleba mamohi yiire: “*Enoodha emusugwege vamulatiligiisu*”.^v

Ologohiwa wa Yesu

(*Matewuzhi 27.57-61; Maruku 15.42-47; Luka 23.50-56*)

³⁸Vooharelaviwa Zhuuze a oArimateya ahimulobaga Pilatu wi amurumedhihe ovenyihavo mwiili wa Yesu. (Zhuuze aali namasuza a Yesu mowiipteya mwaha wowawoova apogo a aZhudewu.) Vano Pilatu agamurumeedhihile, Zhuuze ahivenyihagavo muruthu ole. ³⁹Ahidhaaga teto Nikodemu, ole adhiilege wa Yesu mahiyu. Oliye ahidhaagana dhoonukwela mira ootaganyihiwa ni alowe, dhanyemela kilu maku-mi maraaru. ⁴⁰Aliwa yahithukulaga mwiili wa Yesu, ohuruwedha ni guwo dhoweela vamohi ni dhoonukwela nde, voohariha dhilemeelelo dha ologohiwa wa aZhudewu. ⁴¹Wewo Yesu wakomeliwigiye wahi-kala mudda. Vano mmuddani mule mwahikala nsiye nixa,^w naali nihinalogohiwege muruthu. ⁴²Mwaha wi naali nlabo na aZhudewu noosasanyedhela Paxkwa teto nsiye nddo naaligi vakukuuve, yahimulogohaga Yesu mwemo.

^r 19.28 Moone Masaalimu 69.22 ^s 19.31 *Kayafunile wi miruthu dhile dhikale vamuraddini* Moone Deteronomiyo 21.22-23. ^t 19.31 *Yaakothole meddo* ARoma yookotholesa meddo dha athu ookomeliwa wi ekwege mowaaguva. ^u 19.36 Okuma 12.46; Numero 9.12 ^v 19.37 Zakariya 12.10 ^w 19.41 Masiye a mudhidhi olene yakala wona nikungu. Yaali elemelelo ya kadda emudhi ya aZhudewu yoohelaga miruthu dheewa munsiyeni nimohive.

Ovenyihwa wa Yesu muukwani

(*Matewuzhi 28.1-10; Maruku 16.1-8; Luka 24.1-12*)

20 ¹Nlabo nowambeela na sumaana bebeheene, ogali yihi, Mariya oMagadala ahidhowaga onsiyeni wa Yesu. Ahoonaga wi nibwe na omulago wa nsiye^x ndde nihivenyihawo. ²Mowindo ahithamagelaga wa Simawu Peduru ni wa namasuuzza mmohi ole Yesu amudhiveliye vajinji. Agafiyile ahawaaddelaga, wiira: “Ehimvenyihamo Nabwiya munsiyeni mule, kannonilewo omuheliliisu”. ³Vevale Peduru ni namasuuzza mmohi ole yahikumaga, odhowaga onsiyeni wule. ⁴Aabiileene yahithamagaga vamohi, mbwenye namasuuzza mmohi ole ahithamagaga omukwaranya Peduru, okala muraaji ofiya onsiyeni wule. ⁵Ahiworomaga, woona guwo nde dhigali vevale, vano kaavolowilemo. ⁶Simawu Peduru amuharaga agafiyile, ahivolowaga munsiyeni mule. Ahoonaga guwo dhoweela nde dhigali mwemule, ⁷teto ahoonaga guwo yaaligi mmuruni mwa Yesu. Guwo eyo kayaaligi vamohi ni guwo dhimohi nde, yaaligi veewavene, egali yookuneene. ⁸Vevale ahivolowaga teto namasuuzza mmohi ole muraaji ofiya onsiyeni wule; agoonile, ahiroromelaga. ⁹Aliwa yaaligi ehineeweilemo Maleba Ootaleleya yeera, yaali yoofuneya wi Yesu avenyihwe muukwani. ¹⁰Vooharela anamasuuzza ale yahivelelaga mmawaniwa.

Yesu onomooneyela Mariya a oMagadala

(*Maruku 16.9-11*)

¹¹Mariya ahikalagave owiimeleene ode wa nsiye anddaga. Vano anddaga gave ndale, ahiworomaga oturumelaga munsiyeni mule, ¹²ahawoonaga angero abiili yawarilege guwo dhoweela, yakaraatilege vamburoni vaaligi muruthu wa Yesu, mmohi omuruni, mmohiwa omanyaloni. ¹³Aliwa yahimukohaga, wiira: “Mmani, munanddela ddi?” Oliye ahaakulaga, wiira: “Mwaha wi ehimuthukulamo Nabwiya aaga, vano kaginonile omuheliliisu”. ¹⁴Agawogile dhedhi ahirugunuwaga, vevale omoona Yesu ageemelile, naari ndo kaamudidelege wi aaligi Yesu. ¹⁵Vano Yesu ahimukohaga, wiira: “Mmani, munanddela ddi? Munamusayela aani?” Mariya oobuwelaga wi oliye aali namaanganela a mburo ole, ahiiraga: “Nabwiyani, akala omuthukulilemo di nyo, mugaaddele omwihiyiliinyu wi gamuthukulewo”. ¹⁶Yesu ahiiraga: “Mariya!” Oliye ahirugunuwaga, owoga mu eHeberi, wiira: “*Raboni!*” (Enatapulela wi “namasuuziha”). ¹⁷Yesu ahimwaaddelaga, wiira: “Kugihidde, vovi kaginagwele odhowa wa Baabi. Mbwenye dhowa wa addibilaga, wawaaddele wi: ‘Ginogwela

^x **20.1** Masiye a mudhidhi olene yakala wona nikungu. Moone teto maverisikulu 2-4, 6, 8-9, 11.

odhowa wa aBaba, oyene oli Baabi eenyu teto, odhowa wa Mulugu aaga, oli Mulugu eenyu’ ”. ¹⁸Mariya a oMagadala ahidhowaga wa anamasuuzi, waalaleyela, wiira: “Gihimooni Nabwiya!” Teto ahawaaddelaga dhedho Nabwiya dhamurumiligiye.

Yesu onowiyooniha wa anamasuuzi aaye

(*Matewuzhi 28.16-20; Maruku 16.14-18; Luka 24.36-49*)

¹⁹Nlabo nendde, nowambeela na sumaana, ogaribile, anamasuuzi egatugumane vamohi. Misiwo dhaaligi dhoofugiwadhene mwaha wowa-woova apogo a aZhudewu. Ahidhaaga Yesu, wiimela vaari veewa, owoga, wiira: “Murenddele okale ni nyo!” ²⁰Ageere ndo, ahawoonihaga madada aaye ni mbararuni mwaaye; anamasuuzi yahihagalalaga vajinji vomoona Nabwiya. ²¹Yesu ahiwelelaga owoga madhu mamohive, wiira: “Murenddele okale ni nyo. Wona Baabi ogirumile, miyo teto ginowuurumani”. ²²Agawogile ndo, ahaakudheeelaga mwela, wiira: “Akelani Muneba Woweela. ²³Ayene munaaleleveligiinyu dhoothega dheewa enoodha eleveliwege, mbwenye ale muhunaleleveligiinyu, kidha eleveliwiwa”.

Ohuroromela wa Tome

²⁴Tome, (eethaniwa Ddiddimu’), mmohi mwa anamasuuzi kumi ni abiili ale, kaaligi vamohi ni akwaaye Yesu vadhiiligiiye. ²⁵Vano anamasuuzi akwaaye yahimwaaddelaga, wiira: “Hiyo nihimooni Nabwiya!” Tome ahaakulaga, wiira: “Gaahooni mabamba a perego mmadani mwaaye, gaahihela embuno yaaga mmabambani mwaaye teto gaahihidda ni ndada naaga mbararuni mwaaye, kagidha giroromelawene”.

²⁶Vigavirile malabo matanu ni maraaru, anamasuuzi aaye ale yahiwelaga otugumana mba mule, Tome aaligi vamohi ni aliwa. Misiwo dhaaligi dhoofugiwadhene, naari ndo Yesu ahidhaaga, wiimela vaari veewa, wiira: “Murenddele okale ni nyo!” ²⁷Ageere ndo, ahiwogaga ni Tome, wiira: “Odhena va embuno yaawo; kawiiing’ane madada aaga. Odhena ndada naawo, ohidde mbararuni mwaaga. Kukale oohuroromela, okale ororomela”. ²⁸Tome ahimwaakulaga, wiira: “Nabwiya aaga! Mulugu aaga!” ²⁹Yesu ahimwaadelaga, wiira: “Ororomele mwaha wi ohu- goona? Oorelihiwa baayene enaroromela naari ehoonile”.

Mwahaya wa niivuru ndda

³⁰Vameentoni va anamasuuzi aaye, Yesu ahiiragana dhitoonyihedho dhijinji dhihilebiwe muniivuruni mu. ³¹Dhego dhedhi dhilebeliwe muroromele wi Yesu dili Kirixtu aroromelihiwe, Mwaana a Mulugu, vano mwamuroromela Kirixtu munokalana egumi odheela mu ndina naaye.

y 20.24 *Ddiddimu* enatapulela *anapata*.

Yesu onowawooneyela anamasuuza atanu ni abiili

21 ¹Nuwindo, Yesu ahiwelelaga wiyooneyiha wa anamasuuza aaye onyaza ya oTiberiyasi.^z Ahiyooneyihaga mowinda: ²Yaaligi vamohive Simawu Peduru; Tome (oneethaniwa Ddiddimu);^a Nataniyeli, ookumela nluwa na oKana murudda wa oGalileya; ahima a Zebedeyo ni anamasuuza amohi abiili. ³Simawu Peduru ahiwogaga ni aliwa, wiira: “Ginaya gatote”. Aliwa yahiiraga: “Nihiyeene nnowuuhara”. Yahimaruwaga, ogwela mmwanddeyani. Naari ndo mahiyu alene kayapilege yego.

⁴Ogasile Yesu ahiimelaga seresere ya nyaza. Anamasuuza ale kaya-mudidelege wi aaligi Yesu. ⁵Vano oliye ahaakohaga, wiira: “Anaaga, muhupawo somba?” Aliwa yahaakulaga, wiira: “Nivang'onong'ono!” ⁶Yesu ahawaaddelaga, wiira: “Vokedhani nthavi omoononi wooja wa mwanddeya, muneere ofwanya somba”. Aliwa egavokedhewo nthavi ndde kayaandilege owetela mmwanddeyani mwaha wowiinjiva wa somba. ⁷Vevale namasuuza ole Yesu amudhiveliye vajinji ahimwaaddelaga Peduru, wiira: “Ole di Nabwiya!” Simawu Peduru veewiligiiye wi aali Nabwiya, ahiwaraga yoowara yaaye (vowi eeraga agakuguule,) vano ahilupelaga mu nyaza.

⁸Anamasuuza amohi yahidhaaga ni mwanddeya, owetaga nthavi noodhaala somba. Vowi kayaaligi woolapela ni ode, yaaligi vakukuuve wona meeturu zana. ⁹Ekitaga mmwanddeyani, egwelelaga ode, yahawoona-ga makala a munddo, vigali somba ni mikaathe. ¹⁰Yesu ahawiirelaga: “Dhaanaani somba dhimohi dhipiliinyu dhiinova”. ¹¹Vevale Simawu Peduru ahigwelaga mmwanddeyani mule, owetela nthavi ode. Nthavi ndde naaligi nodhaalanene somba dhuulubale, dhowaakwana somba zana ni makumi matanu ni somba thaaruru (153). Naari somba ndo dhaalive dhinjinji, nthavi ndde kanataleyege. ¹²Yesu ahawaaddelaga, wiira: “Dhaani, muje”. Kaalivo mmohi vaari va anamasuuza ale alibilege muri-ma amukoha, eera: “Muli aani?” Vowi yahididelaga wi aali Nabwiya. ¹³Yesu ahawaaddamelaga, othukula mikaathe nde, waavaha. Ahiiragana emodha-modhave ni somba nde.

¹⁴Ela yaaligi dila ya neethaaruru wi Yesu eyooneyihe wa anamasuuza aaye vavenyihiiye muukwani.

“Waakameele mabila aaga”

¹⁵Aliwa egamalile oja, Yesu ahimukohaga Simawu Peduru, wiira: “Simawu, mwaana a Zhuwawu, onogidhivela okwaranya ala muna-gidhiveleliwa?” Oliye ahaakulaga, wiira: “Ee, Nabwiya, muhunona wi

^z 21.1 Nyaza ya oTiberiyasi Ela si Nyaza ya oGalileya. ^a 21.2 Ddiddimu enatapulela anapata.

ginowuudhivelani”. Yesu ahimwaaddelaga, wiira: “Waakameele mabila aaga”. ¹⁶ Yesu ahimukohaga dila ya nabili, wiira: “Simawu, mwaana a Zhuwawu, onogidhivela?” Oliye ahaakulaga, wiira: “Ee, Nabwiya, muhuna wi ginowuudhivelani”. Yesu ahimwaaddelaga, wiira: “Waakukule mabila aaga”. ¹⁷ Yesu ahimukohaga dila ya neethaaru, wiira: “Simawu, mwaana a Zhuwawu, onogidhivela?” Peduru ahukuwaga mwaha wi Yesu ahimukohaga dila ya neethaaru, eeraga: “Onogidhivela?” Peduru ahaakulaga, wiira: “Nabwiyani, nyo muhunona dhaatedhene. Muhunona wi ginowuudhivelani”. Yesu ahimwaaddelaga, wiira: “Waakameele mabila aaga. ¹⁸ Ebaribareene, ebaribareene, ginowuwaaddela wi ogali muzombwe, wawara weeka odhowaga wewo wafuniwe odhowa. Mbwenye wadha okalaba, onodha otapule moonoo dhaawo, vano mmohi oowarihege, oothukulele wewo ohunafuniwe odhowawo”. ¹⁹ (Yesu awogelege dhedhi wi ooneyihe mukalelo wookwa Peduru weeriye akwe wi amuthithimihena Mulugu.) Ageere ndo, ahimwaaddelaga Peduru, wiira: “Ogihare”.

²⁰ Peduru ahirugunuwaga, omoona namasuza ole Yesu amudhive-liiye vajinji aaharaga. Aaligi namasuza ole asameelege omurimani wa Yesu vamathangani, amukohilege, eera: “Nabwiya, onoopelekeni baani?” ²¹ Peduru agamoonile namasuza ole, ahimukohaga Yesu, wiira: “Nabwiya, ki mulobwana ola, oneeriwena avi?” ²² Yesu ahimwaaddelaga, wiira: “Akala ginafuna wi oliye akalewoove ofiyedha giwele, ki yaawo elivo ddi? Weevo ogiharege”. ²³ Vano dhahiiweyaga vaari va ale yamuhara Yesu wi namasuza ole kadha akwa. Mbwenye Yesu kaamwaa-ddelege wi kadha akwa, eerilege: “Akala ginafuna wi oliye akalewoove ofiyedha giwele, ki yaawo elivo ddi?”

²⁴ Ola di namasuza oneerela onamoona dhedho dheereyilege, oliyeene dalebile dhego nda. Nihinona wi onamoona waaye bwa ebaribari.

²⁵ Vihikala dhego dhimohi dhijinji Yesu dhiiriliye. Dhaatedhene dhahaalebiwe, ginowuubuwela wi mwiilaboni yaatene ya vati kamwaa-kale mburo wowaakwana maniivuru maatene yaalebiwe.